



1518/B


J XLIV
18/e

DISSERTATIO MEDICA

INAUGURALIS,

D E

ARTIS OBSTETRICIAE HODIER-
NORUM PRAE VETERUM
PRAESTANTIA, RATIONE
PARTUS NATURALIS.



DISSERTATIO MEDICA
IN A U G U R A L I S,

D E

ARTIS OBSTETRICIAE HODIER-
NORUM PRAE VETERUM
PRAESTANTIA, RATIONE
PARTUS NATURALIS,

Q U A M,

ANNUENTE SUMMO NUMINE,

EX AUCTORITATE RECTORIS MAGNIFICI

EDUARDI SANDIFORT,

MED. DOCT. MEDICINAE, ANATOMES, ET CHIRURGIAE
PROFESSORIS ORDINARIJ,

NEC NON

*Amplissimi SENATUS ACADEMICI Consensu,
& Nobilissimæ FACULTATIS MEDICÆ Decreto,*

PRO GRADU DOCTORATUS,

Summisque in MEDICINA Honoribus ac Privilegiis rite
et legitime consequendis,


Publico examini submittit

NICOLAUS VAN DER EEM,
H A G A - B A T A V U S.

Ad diem XXIV. Januarii MDCCLXXXIII. H. L. Q. S.

LUGDUNI BATAVORUM,

APUD { JACOBUM DOUZY, }
ET
ABRAHAMUM ET JANUM HONKOOP. } 1783.



V I R O

NOBILISSIMO, DOCTISSIMO,

ABRAHAMO KAPPELHOFF,

M. D.

PRACTICO AMSTELAEDAMENSI FELICISSIMO,

COGNATO SPECTATISSIMO, DE ME, STU-

DIISQUE MEIS OPTIME MERITO,

S A C R U M.

Si Medicinae annales lustremus, &, quae singulae Artis Salutiferae partes vicissitudines ac fata subierunt, attento perpendamus animo, merito mirabimur, nullam inter hasce inveniri, quae adeo lentos & tardos fecit progressus, quam Embryulciam, etsi nec pauciora nec minus momentosa Humano Generi commoda ac beneficia largiatur. Veteres enim utilissimam hanc Artem minime pro dignitate sua excoluerunt, ita ut non tantum maximis defectibus & hiatibus scateant, quae de ea tradiderunt, verum & praeceptis abundant vel ineptis, quae tollendis partus obstaculis minime sunt idonea, vel etiam nocivis, quae non nisi cum matris foetusque detrimento ad usum vocari possunt. Neque meliora docuerunt infecuta secula, quin imo tanta in iis fuit praestantissimae Artis calamitas, ut, inter abjectissimas atque vilissimas reposita, amiculis & ex infima populi fece mulierculis tota demandata fuerit, quae tot nugis, superstitionibus, erroribusque eam defoedarunt, ut Artis nomine prorsus indigna, nullis adstricta regulis, in parturientis haud minus quam foetus damnum adhibita fuerit. At longe alia methodo processerunt Recentiores, imprimis Hodierni, qui illam ab omnibus sordibus, quibus tamdiu squaluerat, repurgarunt, & ex tenebris istis, quibus per tantum temporis spatium oppressa fuerat, ereptam in clarissima luce collocarunt; etsi enim a MAURICAEIO atque DEVENTERO jam multum emendata & adaucta sit, plurimum tamen absuit ab eo fastigio, ad quod, praeunte imprimis SMELLIO atque

P R O O E M I U M.

LEVRETO, nostra aetate execta fuit, ut nunc demum *Artis rationalis* & *Scientiae* nomine insigniri mereatur.

Atque eximia illa Recentiorum in *Artem Obstetriciam* merita, una cum amicissimo commilitone L. VAN LEEUWEN, cum pro gradu *Doctloratus Specimen* nobis esset conscribendum, paulo prolixius pertractare, & ex praecipuis *Artis* momentis ostendere conabimur; ita ut, dum ego in hac *Dissertatione* hanc *Embryulciae hodiernae praestantiam ratione Theoriae* & *Partus Naturalis* demonstrare annitar, ille eandem *ratione Partus Difficilis* & *Praeternaturalis* sit comprobaturus. In hoc autem examine inprimis id agemus, ut *Veterum Graecorum, Latinorum, &*, qui eos secuti sunt, *Arabum doctrinam*, cum probatissimis *Recentiorum praeceptis atque inventis* comparemus; alia vero inutilia, aut a *medii aevi Scriptoribus* prolata, siquidem vel a *Veteribus* manaverint, vel inepta magis etiam contineant, omittamus. Caeterum B. L.

Da veniam scriptis, quorum non gloria nobis

Causa, sed utilitas, officiumque fuit.



*DISSERTATIO MEDICA
INAUGURALIS*

D E

ARTIS OBSTETRICIAE HODIER-
NORUM PRAE VETERUM
PRAESTANTIA, RATIONE
PARTUS NATURALIS.

S E C T I O P R I M A.

*ANATOMICA QUAE DAM AD ARTEM OBSTE-
TRICIAM SPECTANTIA.*

C A P U T P R I M U M.

D E P E L V I.

Vetustissimis temporibus etsi non plane inculta fuerit, primum totius
Medicinae fundamentum, Anatomie, ut vel unus HEROPHILUS tercentum
dicatur sua manu incidisse cadavera, quin & spirantium viva aperuisse corpo-
ra, nec minori laude ornatus fuerit ERASISTRATUS (a): illa tamen, quae
ad

(a) Conf. imprimis summorum virorum BOERHAAVII & ALBINI praefatio ad Editio-
nem VESALII.

2 D I S S E R T A T I O M E D I C A

ad nos pervenerunt , adeo imperfecta atque defectuosa deprehenduntur, ut, nisi Recentiorum inventa praelucent, densis tenebris momentosa illa Medicinae pars obruta, atque sepulta jaceret.

Exemplo sit ipsa Pelvis , quae, licet ossæa sit, nec multa praeparatione indigeat, adeo inaccurate a Veteribus descripta fuit, ut vix praeter nomina horum ossium apud illos occurrant, sicuti ex HIPPOCRATE patet, cujus Osteologiam collegit RIOLANUS (b), nec aliquid memorabile hisce addidit GALENUS (c): CELSUS tamen aliquanto perfectiorem hujus cavi descriptionem exhibuit, notavitque jam differentiam inter pelvim foemininam & virilem, dicit enim: *pecten os rectius in viris, recurvatum magis in exteriora in foeminis, ne partum prohibeat* (d): quae autem circa hanc materiem reliqui Graeci & Arabes tradiderunt, vix memoratu digna sunt; in GALENI enim verba jurantes studiose eadem repetebant, quin tamen proprio Marte quid efficerent.

Excusso tandem auctoritatis jûgo, insurrexerunt nonnulli, qui sedula C. H. inspectione & incisione erronea detegebant, novaque aut praetervisa accurate describebant, unde & in examine horum ossium longe melius processerunt, ut ex VESALIO atque EUSTACHIO apparet, quorum libri hodiernum etiam summo cum fructu consuli possunt.

Nostra vero aetate uti tota Anatome, ita etiam haec pars absolutissime pertractata fuit a Celeberrimis Anatomicis, WINSLOW, ALBINO, SMELLIO, CAMPER, nec non Clar. Praeceptore SANDIFORT, qui perfectissimam horum ossium descriptionem dederunt, eaque pulcerrimis Iconibus illustrarunt, simul-

(b) Vid. *Opér.* p. 533. (c) In *Libr. de ossibus.* C. 20. (d) In *Libr. de Medic.* 8. C. I. p. 506. Edit. ALMELOV.

simulque etiam nexum eorundem ope ligamentorum quam optime nobis exhibuerunt, quorum etiam referendus WEITBRECHT (e) & BENTLEY (f): horum autem plurimi ossa pelvis per veram articulationem inter se conjungi demonstrarunt, inprimis ALBINI, HUNTER, CAMPER, SANDIFORT, & Cl. Praeceptor BONN, qui omnia ad hoc argumentum spectantia collegit, atque egregiis observationibus eadem confirmavit (g), quibus etiam addi possunt BENTLEY (h) & J. G. WALTER (i): quapropter hisce non immorantes praecipua tantum notabimus momenta, quae ad scopum nostrum propius pertinent, & arctiorem habent cum Arte Obstetricia nexum, unde manarunt multa egregia praecepta, quae Embryulciam ad tantum hodie evexerunt culmen, & Veteribus plane incognita & neglecta fuerunt.

Inprimis autem hic in censum venit utilissima illa pelvis divisio in aperturam superiorem, inferiorem, & cavum intermedium, quorum diversam magnitudinem ac dimensiones juxta varias diametros summa cura definiverunt primi SMELLIE (k) & DE WIND (l); etsi enim BURTON jam ante hos viros suum librum ediderit, atque in eo has dimensiones notaverit (m); probabile tamen est, illum ex SMELLII praelectionibus hausisse omnia ea, quae huc spectant, ut notat CAMPER (n), qui ibidem etiam varias pelvis mensuras juxta SMELLIUM, DE WIND & BURTONUM recenset, suasque addit quam accuratissime captas.

Notandum vero, hos omnes Auctores omisisse diametros pelvis obliquas,
ea-

(e) Synthesmolog. Sect. 4. (f) In Diff. de Sectione Synchondr. ossium pubis. Argent. 1779. §. 8—10. (g) In Verhandel. van het Bataafsch Genootschap, T. 3. p. 251. (h) L.c. §. 7. (i) De Dissectione Synchondr. ossium pubis, Berolin. 1782. (k) Vid. a treatise on the theory and practice of Midwifery, Book I. Chapt. I. Sect. 3 T. I. p. 78. (l) 't Geklemd hoofd geredt, p. 85. (m) An essay towards a complete new system of Midwif. Lond. 1751. (n) In praef. ad Edit. Belgic. MAURICAEI p. 3.

4 D I S S E R T A T I O M E D I C A

earumque dimensiones, quas tamen recte notarunt LEVRET (*n*^{*}), STEIN (*o*), SAXTORPH (*p*), PLENCK (*q*), & BAUDELOCQUE (*q*^{*}), & hac maximae esse deprehenduntur, licet in pelvi carne vestita non adeo videantur; ad has autem imprimis esse attendendum in partus negotio, postea patebit.

Hae tamen dimensiones, quamquam ut plurimum in bene formata pelvi eam habent relationem, ut in apertura superiore conjugata minor sit, major autem transversa & obliqua diameter, atque contraria obtineat ratio in ora inferiore, vix ad certas possunt determinari regulas; variae enim inveniuntur in diversis subjectis, uti ex observationibus plurimum venerandi Praeceptoris & Promotoris Celeb. VAN DOEVEREN, (cujus insignem erga nos benevolentiam satis praedicare non possumus,) notavit Doct. J. RIPPING (*r*), & hinc repetenda insignis varietas mensurarum, quae apud CAMPERUM l. c. inveniuntur.

Cum hisce pelvis dimensionibus instituta fuit capitis maturi infantis comparatio, cujus varias diametros propterea observarunt, atque singularum rationem ac magnitudinem sedulo annotarunt obstetricantes: de quibus consulantur CAMPER (*s*), STEIN (*t*), PLENCK (*u*), BAUDELOCQUE (*v*), aliique.

Neque in hisce substitit obstetricantium industria, varios praeterea modos indicarunt, quibus in vivis etiam cognosci possit pelvis capacitas atque forma; ita BAUDELOCQUE ad determinandas aperturae superioris diametros, suadet mensura-

(*n*^{*}) Vid. *l'Art des accouchem.* Paris 1766. Edit. 3. §. 31. qui tamen in eo errat, quod a vulgari consuetudine recedens conjugatam transversam majorem vocat. Conf. etiam *Observat. sur les accouchem. labor.* Paris 1770. p. 136. etsi in posteriore harum observationum volumine, *Suite des observat.* p. 151. vulgarem sententiam & dictionem sequi videatur. (*o*) *Anleitung zur Geburtshilfe*, Cassell 1777. Edit. 2. T. 1. §. 41. Tab. 1. fig. 2. (*p*) *Theoria de diverso partu*, p. 16. (*q*) *Elem. Art. Obstetr.* Vienn. 1781. p. 14. (*q*^{*}) In *l'Art des accouchem.* Paris 1781. T. 1. §. 70. Tab. 2 & 3. (*r*) In *Diff. de pelvi.* L. B. 1776. p. 7. (*s*) L. c. p. 5. & *Auctor.* ibi laudat. (*t*) L. c. §. 401. Tab. 2. f. 2 & 3. & *Kurze beschreibung eines Baromacrometers und eines Cephalometers*, Cassell 1775. (*u*) L. c. p. 27. (*v*) L. c. T. 1. §. 425.

surare distantiam, quae est inter processum spinosum ultimae lumborum vertebrae & medium montem veneris, tum & a latere inter spinas anteriores & superiores ossium Ilii; harum autem prior si 7 aut 8 poll. aequat, altera vero 8 aut 9 poll. in foeminis modice obesis, bonam pronunciat pelvis superioris conformationem (*w*), & huic scopo optime inservire posset instrumentum a STEINIO inventum, Cephalometer dictum, in cuius scala magnitudo corporis mensurandi exacte notatur (*x*). Sed fallax nimium videtur haec methodus, quam ut tuto commendari possit; diversa enim obesitas in variis foeminis lubricum valde reddit hoc de veris pelvis diametris iudicium; quibus accedit, quod in muliere, utut recte extus constituta videatur, adesse tamen possint exostoses, similiaque, quae pelvim reddunt angustiore: hinc & ipse BAUDELOCQUE illam encheiresin rejicit (*y*), quotiescunque status foeminae permittat, ut vel digitus vel tota manus vaginae immitti possit. Idcirco STEINIUS accuratius pelvis magnitudinem definire conatus est instrumento quodam, cuius ope in ipso Corpore conjugatae inprimis magnitudinem dijudicat, Pelvimetrum vocat (*z*); & sane hoc in parturientibus cum fructu adhiberi potest, quem tamen in finem sola manu vel digitis facta exploratio exercitato obstetricanti sufficit, adeo ut nonnulli testentur, praecipue JOHNSON (*a*) & BAUDELOCQUE (*b*), se hac ratione omnes pelvis dimensiones determinare posse ad lineam usque. Aperturae autem pelvis inferioris facile etiam cognosci possunt, digitis ossi Sacro & arcui ossium Pubis, aut tuberibus Ischii applicatis; conf. prae caeteris DE LEURVE (*c*) & BAUDELOCQUE (*d*).

Tan-

(*w*) *L. c. T. I. §. 123.* & in parvo compendio *Chap. 2. Art. 1. Sect. 8.* (*x*) Vid. *Programm. laudat. fig. 6.* (*y*) *L. c. T. I. §. 128.* (*z*) Vid. *Programm. von Pelvimeter, Cassell 1775.* (*a*) *In a new System of Midwif. Lond. 1769. p. 287.* (*b*) *L. c. §. 129.* (*c*) *In Traité des accouchem. Paris 1770. §. 153.* (*d*) *L. c. §. 127.*

Tandem & ab obstetricantibus pelvis axis observata fuit, quae materia etſi a DEVENTERO paſſim in opere ſuo (e) memoretur, atque a SMELLIO indicetur (f), uberius tamen LEVRET (g) & ROEDERER (h) hac de re egerunt; neuter vero pelvis axis juſtam ideam habuit, in errorem enim induſti ſunt ex eo, quod cenſuerint, hanc per unicam lineam eamque rectam poſſe exprimi, non attendentes ob diverſam pelvis altitudinem, qua a poſteriore parte longe profundior eſt, quam ab anteriore, variam quoque eſſe diametrorum inclinationem, adeoque variam axium eas ſecantium directionem: hinc factum eſt, ut VAN DEVENTER (i), SMELLIE & LEVRET ſuperioris tantum pelvis aperturae axin deſcripſerint; linea enim, quam axin vocant, ne tranſit quidem per oram inferiorem, ſed juxta os Coccygis aut finem oſſis Sacri terminatur; in contrarium vero vitium incidit ROEDERER, qui non niſi aperturae inferioris axin exhibuit. Hos errores primus correxiſſe videtur BANG (k), qui tres notavit in pelvi axes, aperturae ſcil. ſuperioris, inferioris & cavi, quae omnes aliam ſervant inclinationem, & ex quarum confluxu integrae demum pelvis axis conſtituitur, huic aſſenſum praeberit STEIN (l), PLEſſCK (m) & BAUDELOCQUE (n).

Quantos autem uſus in arte habeant ea, quae hucusque de pelvi tradidimus, facile apparebit, ſi modo ad ſequentia attendamus; ac

1º. quidem ex diſiſione illa in aperturas & cavum, varium partus naturalis progreſſum accurate determinare, ac de ejus duratione & termino judicium ferre docemur. In partu autem difficili ac praeternaturali, cum diverſa

re-

(e) *Nieuw licht voor Vroedmeesters*, Amſterd. 1765. (f) *A Sett of Anatomic. Tables. Tab. 2. & in treatiſe &c. Book 1. Chap. 1. Sect. 2. T. 1. p. 76.* (g) *In l'Art des accouchem. Part. 1. Chap. 1. Art 1. Sect. 6. p. 7.* (h) *In Elem. A. O. Edit. WRISBERG, C. 1. §. 5. & in Programm. de axi pelvis, in Opuscul. p. 18.* (i) *L. c. fig. 9.* (k) *In Tentam. Medic. de mechanismo partus, Havniae 1774.* (l) *L. c. T. 1. §. 72.* (m) *L. c. p. 15.* (n) *L. c. T. 1. §. 78 & 79.*

requirantur auxilla pro diversa, quam infans intravit, pelvis parte, exinde elucescit, quanti usus sit accurata hujus divisionis observatio, ne perversa eligantur adminicula, quibus iniquis hisce partibus succurratur.

II°. Ex comparatis pelvis foetusque dimensionibus, tam insignia fluxerunt commoda, ut totius Embryulçae rationalis basis ac fundamentum haec doctrina dici mereatur; cum enim universa Ars Obstetricia hoc problemate contineatur, ut cognita pelvis magnitudine ac forma, ex ea ducatur infans, cujus figura & volumen data sunt, sequitur, absque hac diametrorum cognitione solvi non posse hoc problema, id est, foetus ex pelvi eductionem. His nituntur omnes encheireses, quae in partu difficili ac praeternaturali in usum sunt trahendae, ut majores foetus dimensiones respondentibus in pelvi diametris accommodentur, atque ita facilius reddatur infantis protractio. Praeterea si a statu naturali recedant variae hae pelvis foetusque mensurae, vitiata inter utramque proportionem, methodis antea laudatis indagari etiam possunt varii gradus recessus a statu naturali, atque exinde conclusio formari, quatenus in usum sint trahendae, an sola manu, an instrumentis & quibusnam partus sit expediendus. Et cum in virginibus pelvis mensuras explorare etiam docuerint obstetricantes, summa aliquando est hujus adminiculi utilitas, cum de matrimonio ineundo Embryulci consilium quaeritur, ad examinandum, num prave structae sint, & praecipue num ossea pelvis se non habeat juxta dimensiones naturae consuetas, à quibus si multum aberrare deprehendantur, illae virgines a connubio removendae, ut ipsis vita servetur, alias in doloribus terminanda (n*).

III°. Ad

(n*) Conf. imprimis hac de re P. BOUNDER *diff. de nova methodo removendi a partu omnia, quae praevideri possunt, obstracula*. Argentor. 1775. & egregium opus doct. J. P. FRANK *System einer Vollständ. Medicinischen Polizey*, Manh. 1779. I. B. II. Abtheil. III. Abschn. §. 13. p. 340.

III°. Ad axin pelvis quod attinet, cum observatione constiterit in partu naturali infantem juxta varias hasce axium directiones per pelvim transire, & insignia nasci obstacula, si ab hac via aberret, exinde egregium illud praeceptum ortum fuit, omnia partus tam naturalis quam praeternaturalis adminicula ita esse dirigenda, ut secundum has axes foetus producat, & pelvis angustias permeet, cujus praecepti maxime generalis est utilitas.

Quanta itaque sit Artis hodiernae prae veteri praestantia, haec breviter notata abunde probant; cum enim nihil de hisce tradiderint, quae totius Embryologiae principia continent, & quibus omnia Artis praecepta superstructa esse debent, jam in limine hujus Dissertationis apparet, Veterum Embryologiam admodum imperfectam, ac nostra longe inferiorem esse.

C A P U T S E C U N D U M.

D E U T E R O.

Si Antiquorum monumenta evolvamus, plures invenimus, qui de humano utero differentes eandem illi tribuerunt fabricam, ac in brutis, unde per pravam analogiam ad hominem, in quo has partes numquam erant contemplati, concluderunt; alii tamen diversam ab animalibus harum partium in homine structuram indicarunt, at plerique obscure, confuse, nec ad usum nostrum satis idonee.

Prioribus certe adnumerari debet HIPPOCRATES, qui sinus & cornua utero

tri-

tribuit, qualia in brutis conspici solent (*o*): similia habet ARISTOTELES (*p*), qui tamen adfectionem illam dextri vel sinistri lateris, quam alteri sexui adscribit HIPPOCRATES, refutat (*q*); hisce etiam accenseri debet GALENUS, qui asserit, *mulierem uterum habere, qualem vaccam & capram* (*r*), nec cornua GALENI pro tubis Falloppianis accipi posse, uti vult RIOLANUS (*s*), patet ex eodem loco *de usu partium*, ubi dicit, *duas esse matrices in unum collum desinentes*; nisi cum Cl. H. P. LEVELING concludere velimus, GALENUM humana corpora secantem forte in uterum bicornem incidisse, quae tamen opinio haud videtur probabilis (*t*): porro ad hanc classem pertinet ORIBASII, qui sua ex GALENO depromsit (*u*), quem deinde secuti sunt Arabes, uti patet ex AVICENNA (*v*).

Veriora autem de utero tradiderunt inter Veteres CÆLSUS, qui de cornubus, aut sinubus, non loquitur, neque tamen distincte humanum descripsit uterum, etsi de ligamentis latis jam mentionem facere videatur; dicit enim, *Illis foeminae latera sua innectit* (*w*): SORANUS EPHESIUS, qui ante GALENUM juxta HALLERUM vixit, nonnulla habet ex humana Anatome desumpta; uterum enim nusquam bicornem facit, & discrete negat, ut in animalibus convolutum esse, nec male cum cucurbitula medica comparat; fundum quoque ei tribuit, & in humeros, & ostium, & cervicem duplicem illum distinguit (*x*): eandem descriptionem ex SORANO habet ORIBASIIUS (*y*). Cum hisce etiam

(*o*) Vid. *Libr. de natura pueri* p. 248. Foë's. Conf. Sect. 5. *Aph.* 48. & imprimis *Libr. de superfoet* p. 260. in init. (*p*) *De generat. Animal.* L. 1. C. 3. & *Hist. Anim.* L. 3. C. 1. (*q*) *H. A.* L. 7. C. 3. (*r*) *De dissect. vulvae*, C. 3. Conf. *de usu partium* L. 14. C. 4. (*s*) *Anthropograph.* L. 2. p. 180. (*t*) Vid. *diff. de utero bicorni*, Anglipoli 1781. (*u*) Vid. *Collect. Medicin. in Art. Medic. princip.* STEPHAN. C. 29. p. 541. (*v*) *L. Caron.* 3. *Fen.* 21. *tract.* 1. C. 1. p. 704. Basil. 1556. (*w*) *L.* 4. C. 1. p. 185. in fine. (*x*) Conf. HALLER. *Bibl. Anatom.* T. 1. p. 72. (*y*) *L. c.* L. 24. C. 31. p. 542.

etiam conveniunt, quae habet MOSCHIO (z), qui iconem addit satis tolerabilem: RUFUS EPHESIUS, etsi ipse manifeste indicet, nil nisi butorum Anatonomen se traditurum (a), nonnulla tamen habet, quae SORANI descriptioni sunt similia; adeoque ex illo vel alio quodam Auctore videntur depromta (b): tubas Falloppianas jam eidem cognitae fuisse nonnulli putant, quos refellit NOORTWYK (c). AETIUS uterum cum vesica comparat, cornubus sublatis, quae cornua semen ad uterum ex testibus deferunt (d); mirandum tamen, quod hanc structuram in vaccis aut capris melius etiam apparere in fine ejusdem Libri tradat, quas ideo dissecandas commendat (e); quapropter, quae vera de utero habet, ex alio Auctore pariter nata videntur. Unde liquet, Veteres imperfecte admodum uterum descripsisse, plerosque autem non ipsos in has partes inquisivisse, verum ea tantummodo repetivisse, quae priores retulerant. Ipse MUNDINUS, qui proprio Marte cadavera dissecuit, & a GALENO discedens verissima de utero tradidit, septem tamen cellulas utero assignavit (f); ita ut, ante MASSAM (g) & VESALIUM (h), uteri fabrica a nemine recte fuerit perspecta & descripta, a quo tempore plurimi exstiterunt, qui uterum non gravidum optime explicuerunt, eumque pulcerrimis iconibus delinearunt, quos inter nominasse sufficiat SWAMMERDAM & DE GRAAF; & nostra imprimis aetate hanc corporis partem illustrarunt MORGAGNI, HALLER, ROEDERER, HUNTER, WALTER, alique; qui omnia, quae ad hoc thema spectant, adeo absolute pertractarunt, ut nequiquam opus sit hisce amplius inhaerere.

Quod

(z) In *Harmon. Gynaec.* SPACH. part. 1. p. 1. (a) *De C. H. partium appellat. in Art. Medic. princ.* STEPH. L. 1. C. 2. p. 101. (b) *L. c. L. 1. C. 31. p. 109. & L. 2. C. 16. p. 119.* (c) *De utero gravido part. 1. §. 38. p. 39.* (d) Vid. *Tetrabibl. 4. Serm. 4. C. 1. p. 779.* apud STEPH. (e) *L. c. C. 3. p. 781.* (f) Vid. HALLER. l. c. T. 1. p. 146. (g) *Libr. Anatom. introduct.* Venet. 1536, (h) *De H. C. fabrica* Leidae 1725.

Quod vero ad uteri gravidæ dissectionem attinet, de hoc vix quidquam apud Veteres invenitur, nec, testante NOORTWYK (*i*), de hoc argumento ante MASSAE tempora, qui XVI. saeculo vixit, quid certi occurrit: post hunc COLUMBUS & FALLOPPIUS, sed obiter tantum, uterum gravidum examinarunt: multa etiam tradidit VESALIUS huc spectantia (*k*), verum paucas tantum gravidas dissecurasse, aut solummodo tales, in quibus haud satis pro- vecta erat graviditas, vel ex eo patet, quod in prima Editione infantem catelli secundis indutum delineaverit: praecipuus autem dissecti uteri gravidæ honos debetur J. C. ARANTIO, qui egregia huc facientia habet (*l*).

Insignis Anatomicorum numerus est, qui postea praegnantem uterum dissece- runt, eumque delineandum curaverunt, quos recenset HALLER (*m*) & SANDIFORT (*n*); inter quos primarii sunt SMELLIE, NOORTWYK, ROEDERER, ALBINUS, HUNTER, & SANDIFORT, ex quibus, maxime quidem SMELLIO & HUNTERO, mutationes, quae utero gravido per singulos etiam menses accidunt, optime conspici possunt.

Quum uteri gravidæ dissectionem a Veteribus vix institutam fuisse, ex eorum scriptis apparuit, parum quoque de involucris foetus atque secundinis illos co- gnovisse, jama priori intelligitur: & sane, si eorum scripta consulamus, pleraque, quae de hisce tradiderunt, ex brutis desumpta, & ad hominem translata esse in- venimus. Abortus varios examinavit HIPPOCRATES (*o*), praecipue illum, quem ex fidicina acceperat, cui desultu in terram abortum excitaverat, descripsit, qui sex dies a conceptu expulsus fuerat, ut refert, eumque *ovo crudo, a quo externa*
undi-

(*i*) *L. c.* p. 55. (*k*) *L. c. Libr. 5. C. 15. p. 459. & C. 17. p. 469.*
de humano foetu, Basil. 1579. (*m*) *Method. Stud. Medic. T. 1. p. 382.*
Anatom. Pathol. L. 2. p. 4. in notis. (*o*) *Vid. Libr. de Carnibus p. 254.*

(*l*) *Libr.*
(*n*) *Obss.*

undique testa erat ablata, similem pronunciat (p); distinctam tamen ovi humani ideam non habuisse, patet ex l. c. (q), ubi dicit: *quod succedente tempore plures alias accedant membranae, eaeque ab umbilico dependentes*; similiaque alibi profert (r). ARISTOTELES videtur ea, quae de ovo humano tradit, ex HIPPOCRATE desumisse; dixit tamen, umbilicum esse venam in aliis simplicem, in aliis multiplicem, cujus radices ad uterum tendunt, per quas alimentum haurit foetus (s). RUFFUS EPHESIUS fabricam ovi ex brutis descripsit; membranas enim in *ἀμνιον* & *χώραν* distinguit, umbilicum ex duabus venis, totidemque arteriis componi tradit, tum ex quinto *ἐκὰς* urinaulo, brevi vasculo, utrinque cavo, e vesicae fundo in secundas intrante (t): cui assentitur GALENUS (u), ea tamen differentia, quod Allantoïdem inter membranas referat (v); eadem, quae GALENUS, habet AËTIUS (w), nisi quod venas umbilicales prope umbilicum in unam coalescere asserat (x); quinque etiam vasa habet MOSCHIO (y), cum quo consentit CONSTANTINUS AFRICANUS (z). Cum GALENO pro more consonant Arabes, ut AVICENNA (a), qui tamen nonnulla sat bona de nexu ovi cum utero tradidit.

Ex quibus innotescit, ea, quae de ovo ac secundinis apud Veteres prostant, tantum non omnia ex brutis mutuata fuisse, imo erronea GALENI opinio ad VESALII usque tempora viguit; solus fere JULIUS POLLUX diversam fovit sententiam, & bina tantum circa foetum velamina descripsit (b).

De

(p) Vid. *de Natur. pueri* p. 236. (q) *L. c.* p. 237. (r) *L. c.* p. 246. & *Lib. I. de Morb. Mulier.* p. 609. in initio. (s) *De Gener. Animal.* L. 2. C. 4. (t) *L. c.* L. I. C. 37. p. 111. STEPH. (u) *De usu partium* L. 15. C. 5. (v) *L. c.* L. 15. C. 4. (w) Vid. *Tetrabibl.* 4. Serm. 4. C. 2. p. 780. STEPH. (x) *L. c.* C. 3. p. 781. (y) In *Harmon. Gyn.* SPACH. part. 1. p. 13. (z) In *Oper.* L. 3. C. 33. p. 72. Conf. NOORTWYK *l. c.* p. 47. (a) In *L. Canon.* 3. Fen. 21. Traß. 1. C. 1. p. 704. (b) In *Onomast.* L. 2. C. 4. p. 260. Edit. HEMSTERH. Amstel. 1706.

Delineavit quidem EUCARIUS RHODION primus, uti videtur, ovum humanum (*c*), sed ex zona, quae in canibus aliisque nonnullis animalibus placentam format, tum ex ipsa funiculi figura, ac descriptione membranarum, quales tres enumerat, evidentissime apparet, puerum delineasse bruti secundis involutum, caetera ab Arabibus imprimisque AVICENNA mutuatus est; similia habet RUFFIUS (*d*); dein ipse VESALIUS in prima Operum editione eundem, ac RHODION, commisit errorem, quem tamen in altera editione, a FALLOPIO meliora edoctus, correxit & veriora descripsit (*e*).

Quanta vero fuit Veterum in inquirendis humanis secundis negligentia, tanta Hodiernorum in describendis & delineandis hisce partibus diligentia fuit atque industria, ita ut haec Anatomiae pars summum perfectionis gradum adepta fuerit, imprimis per labores eorundem Anatomicorum, quos, uteri gravidi optimas historias atque icones dedisse, antea monuimus, praesertim ab ALBINO, HALLERO, & HUNTERO haec ad umbilicum perducta sunt, ex quorum idcirco operibus, tanquam ex fontibus, optime haec omnia peti possunt.

Verum, antequam haec missa faciamus, notari adhuc meretur, litem esse inter Autores circa uteri cotyledones aut acetabula; quae plerique Veterum in utero humano adesse statuunt, Recentiorum autem plurimi in brutis tantum inveniri asserunt, qui tamen non conveniunt de indole ac significato harum cotyledonum; cum nonnulli illas definiant per vasorum uteri peculiarem cum secundinis nexum, brutis saltem cornigeris & bisulcis familiarem, seu per impressiones quasdam aut sinus, dum alii, inter quos DE GRAAF (*f*), placentas ipsas horum animalium cotyledones appellant; alii vero easdem esse vasorum uteri aperturas & hiatus in

pla-

(*c*) In Libello *de partu hominis*, Francof. 1531. (*d*) In *L. 1. de Muliebr. C. 3.* in SPACH. p. 168. (*e*) *L. c. L. 5. C. 17. p. 470. & p. 823* & 824. (*f*) *de Mulier. organ. C. 15. p. 382.*

placentam autumant: & sane nil aliud, quam vasorum ostia, quae graviditatis tempore expanduntur, per cotyledones Veteres intellexisse, ex GALENO apparet, qui jam suo tempore adversus eos, qui acetabula non nisi in brutorum genere reperiri statuebant, HIPPOCRATIS, DIOCLIS CHARYSTII ac PRAXAGORAE sententiam explicat, dicit enim: *cotyledones esse ora vasorum vulvae*, itemque *venarum ora, quae in vulvam penetrant* (g): ubi etiam asserit, cotyledones vinculum secundinarum firmitus ad vulvam efficere. Idem sentit HARVEUS (h) & FABRIC. AB AQUAPENDENTE (i); cum quibus conferri possunt, quae habet M. C. BOSE (k), ASTRUC (l) & VAN SWIETEN (m).

Nec opus erit pluribus disputare, utrum crassities uteri in graviditate diminuat an increseat; priori opinioni addicti fuerunt plurimi Veterum, inprimis GALENUS (n) & AËTIUS, qui, *uterum*, inquit, *attenuari, velut vesicae flatu impletae solent, crassitudine in longitudinem abeunte* (o); cui sententiae etiam assentitur VESALIUS (p), quam pertinaciter retinet MAURICEAU (q), cui strenue sese opposuit VAN DEVENTER (r), statuens, eandem remanere uteri crassitiem a conceptionis initio ad partum: ARANTIUS aliique e contrario maxime in graviditate augeri uteri substantiam censent (s), unde NOORTWYK concludit, uteri crassitiem nonnumquam augeri, nonnumquam manere eandem, & inter rarissima computandum esse, si quando extenuari contigerit (t): hanc autem attenuationem non adeo raram esse probat Celeb. SAN-

DI-

(g) *De Disssect. vulvae* C. 10. (h) *De generat. Animal.* p. 387. (i) *De formato foetu* part. 1. C. 4. p. 40. (k) *Diff. de obstetric. erroribus a medico Clinico pervestigandis*, Lips. 1729. p. 16. not. II. (l) *Des maladies des femmes.* T. 6. p. 215. (m) *Comm.* T. 4. p. 618. (n) *L. c.* C. 8. & *de usu partium* L. 14. C. 14. (o) *Tetrab.* 4. Serm. 4. C. 1. p. 780. STEPH. (p) *L. c.* L. 5. C. 15. p. 459. (q) *Traité des maladies des femmes grosses.* p. 19. Paris. 1721. Edit. 6^{ta}. (r) *L. c.* C. 8. (s) *De humano foetu.* C. 1. p. 7. (t) *L. c.* p. 111.

SANDIFORT (*u*), qui substantiam potius tenuiorem, quam crassiores observavit in omnibus, quos vidit, uteris graviditate expansis: sed, ut egregie monet Celeb. VAN DOEVEREN (*v*), varia uteri in variis regionibus crassities, quae ut plurimum in graviditate obtinet, illi dissensui ansam potuit suppeditare; vidit enim Celeb. Vir altera gravidæ sectione fundum longe crassiores, quam in utero non praegnanter esse solet, minus vero crassum uteri corpus, eoque tenuius, quo ad ostium magis accederet, in genere tamen non gravidæ crassitiem superans notabiliter; cervix vero uteri sensim sensimque ad orificium usque tenuior conspiciebatur, ibique lineam vix crassa, majorem itaque quam in non gravido, exhibebat tenuitatem (*w*): in altera uteri gravidæ dissectione (*x*) determinatu erat difficile, utrum major minorve durante graviditate facta esset crassities; erat tamen in superiore regione crassior, versusque orificium tenuior (*y*): cum quibus conveniunt, quae habet PLENCK (*z*). Notavit tamen Celeb. VAN DOEVEREN, (uti mecum benignissime communicavit,) cum adstaret operationi caesareae factae nuperrime in pago vicino *Stompwyk* in foemina viva rhachitica, a Doct. C. TERNE Praelectore Obstetr. atque Embryulco Leidensi, uterum in superiore dextra regione, ubi incisio fiebat, vix unius lineae habuisse crassitiem: sed multo crassiores in alia vivente, cui ipse Groningae A. 1766 eandem sectionem instituit; hic autem uterus erat longe magis contractus post aquarum effluxum. Caeterum de hoc argumento conferri merentur ALBINUS (*a*), VAN SWIETEN (*b*), GERMANUS AZZOGUIDI (*b**) & imprimis SANDIFORT (*c*).

Haste-

(*u*) *Obff. L. 2. C. 1. p. 53.* (*v*) *Obff. Academ. C. 6. p. 92. §. 7.* (*w*) *p. 93.*
 (*x*) *C. 7.* (*y*) *p. 102. §. 10.* (*z*) *L. c. p. 30. & in nota.* (*a*) *Annotat. Academic. L. 2. C. 5. p. 26.* (*b*) *Comm. T. 4. p. 455.* (*b**) *In Obff. ad uteri constructionem pertinentibus, Bonon. 1773. §. 50. p. 84.* (*c*) *L. c. p. 50—53.*

Haftenus quae prolata sunt, abunde demonſtrant, uterum, organon illud princeps ac primarium, circa quod totum Artis exercitium verſatur, nequaquam a Veteribus probe cognitum & perſpectum fuiſſe; inſignia ergo eſſe Recentiorum in indaganda harum partium fabrica prae Veteribus merita, ultro liquet, quae eo magis laudari debent, quo praetantiora exinde in Artem noſtram profluxerint commoda: etenim, ut uſus phyſiologicos omittamus, abſque accurato uteri intellectu, nec vera graviditatis ſigna erui poſſunt, nec, niſi de naturali fabrica conſtet, morbos varios matricis, ſitus ejus vitia, ſimiliaque intelligere datur; imprimis autem, in quo rei cardo verſatur, ſi, quomodo ſecundum naturam genitalia ſeſe habeant, ignoremus, ne in naturali quidem partu apta adminiſtrantur auxilia, ex quorum perversa applicatione ſaepe in tali caſu haud facile removenda oriuntur obſtacula: magis autem in partu difficili ac praeternaturali de utilitate anatomicae harum partium cognitionis confirmamur, ſiquidem omnia, quae commendantur, adminicula, hiſce ſuperſtructa eſſe debeant; quapropter, iis neglectis, nec adaequata talia remedia inveniri, nec etiamſi inventa rite applicari poſſunt. Neque minus etiam ſecundinarum inſpectio obſtretriciſ neceſſaria reputari meretur, cum magna inde derivantur commoda, ut funis umbilicalis diſſectio, ejus ligatura, atque placentae extractio recte peragantur; ut modus & tempus placentam ſolvendi perſpiciantur, atque noxae ex incongruo ejus ſitu & nexu oriundae intelligantur.

Quae omnia ſunt ejusmodi, ut errores hac de cauſſa non leves a Veteribus neceſſario fuiſſe committendos, evidenter doceant, qui hodie ſummo cum Artis emolumento evitantur; & haec deinde magis patebunt, ubi, per ſingula eundo, latius haec omnia pertractabimus: ſufficiat interim breviter indicaffe, Artem, quae hodie excolitur, & hac in parte Veterum longe eſſe antepoſendam.

Hiſce de pelvi & utero, ceu partibus, quae in Arte Obſetricia prae caeteris

ris considerari merentur, praemissis, transimus nunc ad nonnulla momenta, quae graviditatem spectant, & omissis illis, quae ad Physiologiam magis pertinent, ea inprimis perstringemus, quae maxime ad Embryulciam faciunt, ac primo quidem videbimus de signis graviditatis.

S E C T I O S E C U N D A.

NONNULLA MOMENTA CIRCA STATUM
GRAVIDITATIS.

C A P U T P R I M U M.

DE SIGNIS GRAVIDITATIS.

Arduum semper fuit praesentem graviditatem dignoscere; quia error facile committitur propter congeneres in utero affectus, qui cum impraegnationis statu confundi possunt, tum & propter graviditatem aemulantium morborum communia symptomata; hinc antiquitus jam in ejus signa inquisitum est, quae cum, inter alios Veteres, HIPPOCRATES non omni dubio majora esse deprehenderet, saepe anceps haesit, quid definiret nescius; unde nec filiam Praefecti annonae apud TECOMAEUM (*d*), nec sororem TEMENEI (*e*), etsi quaedam sympto-

(*d*) In *Libr. 4. de morb. vulg. p. 1129. N. 24.* (*e*) *L. c. p. 1131. N. 28.*

symptomata gravidas indicarent, tales pronunciare ausus fuerit: nemo autem tam promte graviditatem compertam habuit, quam DEMOCRITUS, qui *puellam* HIPPOCRATIS comitem, primo die ita salutavit, *salve virgo*, postridie vero, *salve mulier*. Fuerat enim puella nocte illa vitata (f): interim, licet HIPPOCRATES, & reliqui Veteres, quam maxime saepe cespitarent circa hunc statum definiendum, plurima tamen eaque diversa, nonnulla & ridicula exhibent indicia, quorum primaria, ridiculis & absurdis ommissis, operae pretium erit examinare, ut inde perspicere detur, an fides hisce sit habenda, nec ne, & in quantum inter signa diagnostica graviditatis recenseri mereantur; in quo examine simul patebit, ipsos Veteres in enarrandis hisce notis nequaquam sibi constitisse, sed quae mox inter certissima graviditatis indicia retulerant, mox haec eadem a causis diversissimis repetiisse.

Inter haec ab omnibus memorantur coloris mutationes, oculorum habitus alienatus, inhorrescentia, incalescentia, stridor dentium, convulsiones, appetitus depravati, quae nonnumquam in gravidis deprehenduntur, & ortum suum habent a singulari illa mutatione, quam conceptum in utero semen masculinum producit; de hisce pluribus agit HIPPOCRATES (f*), & cumeo ARISTOTELES (g), MOSCHIO (h), AETIUS (i), nec non AVICENNA (k): haec tamen dubia quam maxime esse reputanda, vel ex eo patet, quod in vera conceptione saepe non observentur, neque illa rescire dentur Medico, nisi ex incerta mulierum narratione; hinc ipse HIPPOCRATES in

quan-

(f) Vid. DIOGEN. LAËRT. de vitis Philosoph. T. 2. p. 572. Segm. 42. Edit. MEIOM. Amstel. 1692. (f*) Vid. Libr. de carnibus. p. 254. l. 11. de superfoet. p. 262. l. 7. de morb. mul. L. 1. p. 602. in fine. de iis, quae uterum non gerunt. p. 677. l. 11. (g) Hist. Anim. L. 7. C. 4. (h) In Harm. Gynaec. part. 1. C. 4. p. 2. ubi etiam aliorum Auctorum sententia invenitur. (i) Tetrab. 4. Serm. 4. C. 8. p. 782. STEPH. & C. 10. (k) L. Canon. 3. Fen. 21. Traët. 1. C. 11. p. 712.

quantum foeminae ipsi ita indicarunt, tantum etiam se scire profitetur (l); deinde tantum abest, ut in sola graviditate haec locum habeant, ut ab aliis etiam caussis, a graviditate multum diversis, producantur, de quibus inprimis consulendus SWIETENIUS (m).

Huc etiam ab illis refertur mensium suppressio, ita HIPPOCRATES loquitur: *Si mulieri purgationes non prodeant, neque horrore, neque febre succedente, ciborum vero fastidia ei accidant, gravidam esse existimato* (n); cum quo consentit etiam AËTIUS, qui tamen addit, *si circa consuetae purgationis menstruae tempora aggravantur* (o), nec non AVICENNA (p): verum dantur & aliae caussae, eaeque diversissimae, quae catameniorum fluxum cohibere possunt, quarum plurimas enumerat VAN SWIETEN (q); quin & ipse HIPPOCRATES idem a scirrho uteri contingere jam observavit: *Si uteri tumorem durum senserint, menses absconduntur* (r): unde liquet, hanc mensium retentionem pro haud fallaci graviditatis signo haberi non posse; accedit & hoc, quod plura dentur observata, ubi durante graviditate menstrua fluere non desierunt, illaesa tamen matris & embryonis sanitate, quod jam suo tempore cognovit ARISTOTELES, dicit enim: *Quibusdam menses ad finem non cessant profluere quamquam gravidis* (s), & haec Recentiorum observatis confirmantur, quorum insignem catalogum habet HALLER (t).

Nec uteri incremento, vulgari admodum graviditatis indicio, confidere ausus fuit HIPPOCRATES; ut neque lactis in mammis generationi; ita ut pluribus in locis sollicitè moneat, cavendum esse, ne nimium hisce signis tribua-

tur,

(l) *Libr. de carnib. p. 254. l. 17.* (m) *Comm. T. 4. p. 462.* (n) *Vid. Aph. 61. Lib. 5. Conf. de natur. pueri. p. 237. in initio.* (o) *L. c.* (p) *L. c.* (q) *Vid. Comm. ad. Aph. 1285.* (r) *Vid. Libr. de natur. muliebr. p. 577. l. 28.* (s) *Hist. Animal. L. 7. C. 2.* (t) *Vid. Elem. Phys. T. 7. part. 2. p. 143.*

tur, quae ab aliis uteri affectibus haud raro proficiuntur, inprimisque a mensium retentione, cujus symptomata pulcre enarrat: *At conclusi uteri menses ad mammas remittunt, & ad pectus ascendere cogunt, venter imus attollitur, & inexpertae uterum gestare sibi videntur, cum iis eadem, qualia praegnantibus ad septimum aut octavum usque mensem contingant, venterque pro temporis ratione increseat, pectus attollatur, lacque gigni videatur (u); nec raro eadem locum habere in uteri mola (v), hydropse (x), ventosa conceptione (y), similibusque uteri morbis, recte animadvertit.*

Maximi vero momenti habuerunt orificii uteri occlusionem in statu graviditatis determinando, ita HIPPOCRATES: *Quae utero gerunt, iis uteri os connivet (z), & GALENUS in graviditate uteri cervicem ita claudi voluit, ut ne vel tenuissimo quidem specillo aditus foret (a); idem statuit ARISTOTELES: Cum uterus semen genitale comprehenderit, plerisque statim occluditur, quoad septimus mensis exigatur. Octavo aperitur (b), nec non AËTIUS, qui insuper addit, orificium aliquantulum sursum progredi (c); nec ab hac sententia alienus est AVICENNA, qui dicit: Succedit ei (impraegnationi) vehemens adunatio oris matricis, ita ut non ingrediatur ipsum filius, & similiter ejus elevatio ad superiora & anteriora (d):* verum neque hoc signum omni exceptione majus dici meretur, imo vero nequaquam inter graviditatis signa admitti potest, quippe quod orificium uteri clausum deprehendatur in virginibus, & in ipsis gravidis saepissime apertum inveniat, inprimis in illis, quae plu-

(u) Vid. L. 2. de morb. mul. p. 648. in initio. Conf. Aph. 39. L. 5. & CELS. L. 2. C. 8. p. 76. l. 7. (v) L. 1. de morb. mul. p. 618. l. 48. & L. 2. de morb. mul. p. 648. l. 21. (x) De natur. muliebr. p. 563. l. 18. (y) De natur. pueri, p. 246. l. 30. (z) Vid. Libr. 5. Aph. 51. Conf. de genitur. p. 233. l. 26. (a) Libr. de dissect. vulvae, C. 7. & Comm. in HIPPOCR. Aph. 51. Libr. 5. (b) H. A. L. 7. C. 4. (c) L. 6. (d) L. c.

pluries pepererunt; unde magis haec ex hypothefi dicta videntur a Veteribus, quam ex observatione, cum exiftimarent, impraegnationem fieri non poffe, niſi omnè ſemen a conſtricto firmiter uteri offio retineretur; hinc ſteriles pronuntiavit HIPPOCRATES, quibus uteri nimium dehiſcentes non ita occludi poſſent, ut ſemen non eflueret, dicens: *Si plus aequo uteri dehiſcant, neque ſic concipit. Neque enim ſemen uteri retinent (e), & conceptionis indicium ex eo deſumit, ſi mulier prae ſiccitate ignoret, ſemen a viro miſſum fuiſſe. (e*)*.

Tandem & ipſius foetus motus inter graviditatis ſigna recensuerunt Veteres; ita HIPPOCRATES exinde veram graviditatem ab aliis morbis diſtingui voluit. (f), imo vero ſtatutum tempus definivit, quo exacto, cum motus non percipiatur, adeſſe morbum in utero declarat, dicit enim: *Mas tertio, foemina quarto menſe motionem habet. Ubi igitur tranſacto hoc tempore non movetur, hic certe morbus eſt (g)*; itemque ARISTOTELES, mares quadrageſimo, foeminas nonageſimo die in utero moveri, aſſerit (h). Sed fallax maxime hoc eſt indicium; cum ſpasmī hysterici, inteſtina flatibus diſtenta, aut vermes in iis nidulantes ſaepiſſime tales motus producant, quin & ipſe uterus inordinate motus, haud abſimiles perceptiones excitet (i): & quod magis eſt, accidit haud raro, ut per totam graviditatem hanc motionem non perſentifcant gravidæ, & tamen ſuo tempore partum vivum vegetumque emittant (k), quod

mi-

(e) De iis, quæ uterum non gerunt, p. 676. in initio. Conf. Libr. de genitur. p. 233. l. 27. de natur. muliebr. p. 567. l. 23. de morb. mulier. L. 2. p. 662. l. 6.

(e*) Vid. de ſuperfoet. p. 263. l. 3. & de his, quæ uterum non gerunt, p. 679. l. 10. (f) De morb. mul. L. 1. p. 618. in ſinc. & ibid. L. 2. p. 68. l. 15. de natur. pueri, p. 241. l. 23.

(g) LL. cc. (h) Hiſt. Anim. L. 7. C. 3. (i) Conſuli hac de re inprimis mereatur Celeb. VAN DOEVEREN Obſſ. Acad. C. 11 §. 8 & 9. (k) Vid. MAURICEAU l. c. L. 1. C. 3. p. 73. SMELLIE Collection. 5. Number 1. T. 2. p. 53.

minime mirum videri debet, cum facile intelligatur, hanc motus sensationem dependere a vigore foetus, a sensibilitate & insensibilitate mulieris gravidæ, a copia liquoris amnii, similibusque, pro quorum diversa ratione differt ipsius foetus motus, vel magis minusve valide a gravida percipitur.

Ex his, quæ attulimus, manifesto apparet, omnia illa, quæ a Veteribus tradita fuere, nequaquam pro certis ac determinatis graviditatis indiciis haberi posse; dari enim morbos, in quibus hæc omnia vel seorsim vel conjunctim occurrunt, quemadmodum ex ipsis Veterum locis abunde probavimus; etsi ab altera parte non dissitendum, non omni prorsus pondere illa destitui, inprimis si plura horum concurrant, quapropter nec hodie plane rejiciuntur, ita tamen, ut inter probabilia tantum recenseantur, neutiquam vero inter indubia annumerentur.

Praestantissimum autem a Recentioribus adhibetur adminiculum, quo dubius hic status, tertio saltem elapso mense, certo enodari queat, & a congeneribus affectibus distingui; Exploratio scilicet, qua, cognita uteri virginei fabrica, ac perspectis omnibus illis mutationibus, quæ eidem prægnanti constanter contingunt, iisque diversis pro vario graviditatis termino, nec ab aliis causis producendis, in hujus organi habitum inquiritur, ut inde patefeat, num re vera graviditas obtineat, & si adsit, ad quodnam fuerit provecta stadium. Equidem, si attentius Veterum scripta perlustremus, eandem, de qua agimus, operationem jam sæpius ab illis commendatam inveniemus ad varios uteri morbos dignoscendos, inprimis apud HIPPOCRATEM, qui de variis matricis affectibus agens, recte monet, *attendendum ad uteros quomodo se habeant, & ut semper omni tempore bene habeant, & osculum rectum apertumque sit* (1): ita ad hydropem uteri distinguendum ex uterorum osculo indicium sumit, ad

taclum

(1) Vid. de morb. mulier. L. 2. p. 652. l. 35.

tactum enim gracile deprehenditur (m), & alibi addit, os uteri prae humoris copia evanescens comperies (n); in fluxu uterino nimio suadet etiam, ut orificium digito exploretur, dicit enim: *Quod si digito contigeris, os dehiscens deprehenderis* (o); in scirrho uteri os asperum inveniri, alio loco asserit (p); porro in atresia uteri eundem tactum instituendum suadet: *Si membrana ori uteri protenditur, cognosces, si digito ad attrectandum immisso obicem attigeris* (q); inprimis vero ad deviationes uteri cognoscendas, hanc encheiresin ubique laudat atque eosdem fere in usus a reliquis Veteribus eadem operatio adhibita fuisse videtur. Suspiciari quis etiam posset, Veteres explorationem uterinam instituisse ad graviditatem detegendam, cum, uti antea vidimus, HIPPOCRATES censeat, os uteri a conceptu claudi (s), quod absque tactus negotio rescire haud potuisse videtur, eo magis, cum GALENUS in Comm. ad hunc Aphorismum sequentia habeat: *Hoc maximum est mulieris, quae concepit, indicium, si digito immisso obstetrix os uteri potuerit attingere: Nam ubi primum uterus intra se semen concepit, universam capacitatem suam contrahit, osque claudit. Videtur tamen propter inflammationem etiam & scirrhum arctari os uteri. Id vero ipsius duritiae distingues* (t): quia vero HIPPOCRATES nullibi hanc encheiresin ad graviditatis diagnosin expresse commendat, nec apud reliquos Veteres ulla hujus invenitur mentio, probabile admodum est, haec potius ex praeconcepta opinione, de qua antea vidimus, nata fuisse; & licet jam demus, tactus ope in graviditatem inquisivisse, parum tamen commodi inde haurire poterant, siquidem illa occlusio orificii uterini, ad quam solam attendebant,

pre-

(m) Vid. de natur. muliebr. p. 563. l. 43. (n) L. c. p. 576. in fine. (o) L. c. p. 567. l. 24. (p) L. c. p. 577. l. 26. Conf. p. 578. l. 11. (q) L. c. p. 582. l. 8. & de morb. mulier. L. 1. p. 599. l. 5. (s) Vid. Libr. 5. Aph. 51. (t) In T. 9. p. 225. Edit. CHARTER.

precario ab illis assumpta fuerit, minimeque inter signa praegnantis uteri sit habenda, quod supra probavimus; nec sane haec operatio a Veteribus cum fructu institui poterat, quos vera non tantum uteri fabrica, sed & omnes illae mutationes, in utero gravido observandae, penitus latebant.

Recentissimis demum temporibus nostros in usus adhiberi coepit haecce encheiresis, inprimis a tempore MAURICAEI (u) atque DEVENTERI (v), quam omnes deinde secuti Obstetricantes communi consensu in Artem receperunt, tanquam certissimum & unicum fundamentum, quo graviditatis difficilis diagnosi nititur, cum hic ipsa manu successivas illas uteri mutationes examinare liceat. Nimis autem longum foret, omnes illas conditiones, quae pro vario graviditatis progressu in utero contingunt, late exponere, quas omnes & singulas egregie pertractarunt SMELLIE (w), ROEDERER (x), STEIN (y), & BAUDELOCQUE (z), quos idcirco indicasse sufficiat.

Ad ipsam vero explorandi methodum quod attinet, unicum illud notandum censeo, optimam esse, quae fit non tantum digito vaginae immisso, sed & altera simul manu regioni hypogastricae imposita, ut, utero digito sursum pressio, impetum uteri gravidi vola manus hypogastrio incumbentis persentiscat, atque ita ex matricis volumine, de graviditate ejusque progressu certius judicium ferri possit: hanc encheiresin prae caeteris laudarunt PUZOS (a), LE-

VRET

(u) L. c. T. 1. L. 1. C. 7. p. 97. (v) L. c. C. 13. (w) *A treatise &c.* Book 1. Ch. 3. Sect. 3. T. 1. p. 118. (x) *Elem. Art. Obst.* C. 3. & in G. W. STEIN *diff. de signorum graviditatis aestimatione*, §. 43. & seqq. in *Opuscul.* p. 357. & inprimis haec Dissertatio de caeteris gestationis indiciis consuli meretur. (y) STEIN l. c. T. 1. Abschnitt 2. C. 2 & 6. qui tamen in eo fallitur, quod §. 169. mutationem rimae transversae orificii uterini in formam circularem omnium certissimum primis mensibus graviditatis indicium pronunciet, quum illa mutatio minime constans deprehendatur, & in ipsis etiam primiparis orificii forma ad tertium aut quartum mensem naturalis maneat. (z) L. c. T. 1. part. 1. Chap. 1. Articl. 3. Sect. 1. p. 79. (a) *Traité des accouchemens*, Paris 1759. p. 57.

VRET (*b*), DE LEURVE (*d*), & BAUDELOCQUE (*e*), qui tali modo etiam foetus motum alternum passivum (*ballottement*) optime percipi posse, indicat (*f*): caeterum de toto tactus negotio praeter hosce Auctores videri possunt SMELLIE (*g*), ROEDERER (*h*), G. A. FRIED (*i*), STEIN (*k*), PLENCK (*l*), & VAN DE LAAR (*m*).

Et haec sufficere nobis videntur, ut constet, & hac in parte hodiernam Embryulciam veteri longe esse anteponendam, eo magis, cum haec operatio non tantum in eruendis graviditatis signis summae sit utilitatis, sed & in ipso partu naturali ad varios foetus progressus indicandos apprime conveniat; in partu autem difficili & praeternaturali ad varia obstacula recte indaganda, unicum sese praestet obstetricanti adminiculum; unde liquet, quam late ejus in Arte usus pateat. Progrediamur jam ad alterum gestationis momentum, quod agit de Situ foetus in utero.

C A P U T S E C U N D U M.

D E S I T U F O E T U S I N U T E R O.

Communis erat olim & ab omnibus recepta opinio, foetum humanum in utero materno ita esse collocatum, ut membris inflexis, incurvata spina, capite ad

(*b*) *l'Art des accouchemens*, part. 2. Chap. 7. §. 452. (*d*) *L. c.* part. 1. Livr. 2. Sect. 4. p. 65. (*e*) *L. c.* T. 1. §. 352. & seqq. (*f*) *L. c.* §. 365. & seqq. (*g*) *L. c.* Book 3 Chap. 1. Sect. 2. (*h*) *L. c.* C. 11. (*i*) *Anfangsgründe der geburtshülfe*. Strassburg 1769. Buch 2. Kap. 2. p. 28. (*k*) *L. c.* T. 1. Abschnitt 2. Cap. 4. (*l*) *L. c.* p. 34. (*m*) *Schets der verloskunde*. C. 6. p. 50. Edit. secund.

ad genua adactō, forma convoluta sedentis exhiberet figuram, pedibus ad orificium uteri, capite ad fundum, facie ad ventrem matris directis; hunc vero situm versus certum graviditatis terminum, septimo scilicet aut octavo mense, ocius serius in contrarium mutari, ita ut caput foetus ad orificium uteri prolaberetur, facies spinam matris, pedes fundum uteri respicerent, donec naturali excluderetur partu, quem praeternaturalem crederent, si circumvolutio ista non contigisset.

Dubium equidem videtur, an hanc sententiam foverit HIPPOCRATES, nam in *Libr. de Natura Pueri* sequentia habet: *At vero puer, ubi in utero existit, manibus ad genas adhaeret, caputque pedibus proximum habet, neque certo dignoscere queas, etiamsi puerum in utero videas, utrum caput sursum an deorsum vergat (n)*, unde haesitasse videtur in determinando vero foetus situ; opponitur quidem huic alius ex HIPPOCRATE locus (o), ubi inquit: *Puer autem, ubi partus instat, laborare incipit & in vitae periculum venire, cum in utero vertitur. Producentur siquidem omnes capite sursum, in lucem vero prodeunt in caput multi, ac multo securius liberant, quam qui in pedes eduntur: hunc dissensum ut componeret MERCURIALIS, ARISTOTELEM affert, qui haec habet: Omnibus aequè animalibus caput primum superius esse in ovo, sed cum creverint, & jam exitum appetant, deorsum deduci (p); cum autem ille ab HIPPOCRATE multum mutuatus fuerit, totumque de *Natura Pueri* Librum in suos usus converterit, censet MERCURIALIS, HIPPOCRATIS explicationem ex ARISTOTELE esse petendam, adeoque in *Libr. de Oñi-*
mes.*

(n) Vid. p. 245. l. 40. etsi forsan HIPPOCRATES ex gallinarum genere ad hominem concluderit, cum in seqq. moneat, haec omnia in gallinarum ovis incubatis optime conspici posse: cum tamen antea notavimus, abortus aliquot ab illo vivos fuisse, probabile est, ex iisdem hunc situm, compertum habuisse. (o) Vid. de oñimestri partu, p. 258. l. 33. (p) In *Hist. Anim.* L. 7. C. 8.

mesi Partu illum loqui de primis mensibus, cum caput foetus superiora spectat, in Libro vero *de Natura Pueri*, de mensibus mediis, cum caput foetus in medio uteri locatum, nec sursum, nec deorsum vergere dici possit (q); sed praeterquam quod Liber *de Oëtimestr. Partu* ab omnibus HIPPOCRATI non attribuatur, & obscurus sit, qui hic occurrit, locus, manifesta nimis sunt verba, quae in genuino Libro *de Natura Pueri* reperiuntur, ita ut certo concludere possimus, ancipitem circa hanc rem haesisse HIPPOCRATEM. GALENUS (r) vetustissimam hanc esse opinionem testatur, eique etiam assensum praebet, cujus sententiam deinde Veteres Medici omnes amplexi fuerunt.

Nec defuerunt inter Recentiores, qui huic sententiae suum etiam calculum adjecerunt, quos omnes recenset Celeb. VAN DOEVEREN (s), (qui absolutissime hanc materiem pertractavit, ita ut huic quaestioni facile supersedere potuissemus, nisi instituti nostri ratio id postulasset, & ab eo tempore alii insurrexissent, qui huic opinioni addicti, eandem ulterius stabilire conati fuissent:) quibus addi possunt ULHOORN (s*), LEVRET (t), ASTRUC (u), FRIED (v), STEIN (w), VAN SWIETEN (x), P. A. MARHERR (x*), & PLENCK (y): notandum vero, inter hos dari, qui ROEDERERI (z) sententiam secuti, non uno impetu, sed sensim, ob gravitatem partium foetus supra umbilicum auctam, fieri hanc circumvolutionem autumant, inprimis FRIED, PLENCK & STEIN, qui adeo lente hanc motionem fieri censet, ut totus mensis sextus & septimus huic inpendatur (a).

Alii

(q) Vid. *de morb. mulier.* L. 2. C. 2. in SPACH. p. 230. (r) In *Comm. I. in Libr. 6. HIPPOCR. de morb. vulgarib.* T. 2. p. 153. apud JUNTAS. Conf. RIOLANI *Anthropograph.* L. 6. C. 10. (s) L. c. C. 7. p. 107. & seqq. (s*) *Over de spina bifida* pag. 9. (t) *Essai sur l'abus des règles générales* &c. Paris 1766. p. 89. & seqq. (u) L. c. T. 5. p. 357. & seqq. nec non *l'Art d'accoucher réduit à ses principes* &c. L. 1. C. 5. (v) L. c. L. 1. C. 5. §. 62 & 63. (w) L. c. T. 1. Abschn. 3. Cap. 6. §. 384 & 389. (x) *Comm. T. 4. p. 517.* (x*) In *Praelektion. in BOERHAAV. Instit. Medic.* T. 3. p. 645. (y) L. c. p. 27. (z) L. c. C. 4. §. 84 & 85. (a) Vid. STEIN l. c. §. 389.

Alii tamen inveniuntur, qui contrariam amplexi sententiam a prioribus dissentirent, inter quos primus fuit REALDUS COLUMBUS, testante Doctiss. ONYMO (b); hic enim jam suo tempore explosam pronunciavit illorum opinionem, *homines priusquam utero exeant, simiarum instar sive funambulorum vel mimorum a capite ad pedes, vel e contra delabi & procumbere, vel e converso*; id enim loci angustia minime patitur, quae tanta est, ut vix nostri sit capax cum excrementis membranisque (c); fatetur enim, se sectione anatomica edoctum, plerosque foetus capite deorsum jacere; idem tradidit FELIX PLATERUS (d); incertum esse foetui in utero situm, notavit etiam A. PARRAEUS (e); dein SLEVOGT in duobus humanis uteris, quinque & septimestria embrya continentibus, figuram plane neglectam & irregularem suis usurpavit oculis (f): porro sententiae Veterum etiam sese opposuerunt M. C. BOSE (g), SMELLIE (h), D. MONRO (i), ONYMO (k), P. A. BOEHMER (l), DE LA MOTTE (m), CAMPER (n), VAN DOEYEREN (o), MARTIN (p), JOHNSON (q), C. WHITE (r), SANDIFORT (s), VAN DE LAAR (t), nec non BAUDELOCQUE (u). Et om-

ni-

(b) Vid. Diff. de naturali foetus in utero materno situ, Leidae 1743. §. 11. quae recusa existat in HALLER. disputat. anatomic. T. 5. p. 319. (c) De re anatomica L. 12. p. 463 & 64. Francof. 1593. (d) In SPACHII Gynaecior. collection. p. 8. (e) Vid. de generat. homin. C. 14. in SPACH. p. 410. (f) In Diff. J. A. FASCHII de partu naturali collato cum praeternat. Jenae 1705. §. 23. (g) L. c. p. 21. (h) L. c. L. 3. Chap. 1. Sect. 1. T. 1. p. 178. (i) In Essais and observat. physic. and literar. of a society in Edimbourg. T. 1. Art. 17. (k) Diff. L. (l) Disquis. de situ uter. grav. foetusque a sede Plac. in utero per regul. mechan. deducend. §. 11. not. t. quae existat post MANNINGHAM Comp. Art. Objt. Halae 1746. Conf. etiam ad idem opus. Praefat. p. 9. (m) In Traite complet des accouchem. L. 1. C. 21, 22, 23. & L. 3. C. 44. Leide 1729. (n) In Praef. ad edit. Belgic. MAURIC. p. 21—28. (o) L. c. C. 7. p. 108. & seqq. (p) In Ad. Saccic Vol. 29. Conf. Celeb. SANDIFORT Natuur- en Geneeskundige Bibliotheek, T. 10. p. 11. & seqq. (q) L. c. p. 184. (r) Vid. on the management of pregnant and lying-in women &c. Lond. 1773. p. 242. & seqq. (s) Objt. L. 2. C. 1. p. 49. (t) L. c. §. 70. p. 27. (u) L. c. T. 1. part. 1. C. 4. Sect. 3. p. 144.

nino hac in re cum Celeb. VAN DOEVEREN esse faciendum mihi videtur, qui statuit, *naturalem maxime & consuetum foetus in utero situm esse talem, ut si uterus recte positus sit, a primis gestationis mensibus, usque ad hujus terminum, capite suo innitatur orificio, vel saltem segmento inferiore uteri, pedibus vero fundum ejus petat; — Eum vero situm nequaquam esse constantem, sed durante graviditate saepissime mutari, ut modo transversus sit, modo hanc, modo oppositam, corporis partem, ad orificium positam habeat, imo non raro fundum uteri suo Capite petat Foetus (v).* Et sane foetum naturaliter capite deorsum pendere, docent varia argumenta, quorum praecipua hic recensere liceat.

I°. Major pars corporis foetus supra umbilicum, & insigne capitis volumen necessario situm ejus versus orificium determinant: nec contra hanc assertionem facit STEINII objectio (w), qui majus quidem concedit esse capitis volumen; non vero densitatem, quae maxime respici debet in cujusdam corporis gravitate definienda, illudque illustrat spongiae exemplo, cujus exigua pars aquâ imbuta longe gravior est, quam major ejusdem, sed siccatae quantitas; verum haec omnia ad foetum applicari non possunt; cujus non tantum capitis volumen amplius esse deprehenditur, sed & major densitas, atque ita etiam gravitas; & hoc vel inde patet, quod ex fune suo suspensus embryo semper capite inferiora petat, hinc in omnibus ovis humanis apertis, & liquori cuidam immersis, hunc situm semper observaturi sumus, qualem etiam in delineationibus cernere licet apud RUYSCHIUM (x), SMELLIE (y), ALBINUM (z), HUNTERUM (a), SANDIFORT (b), aliosque.

II°. In

(v) L. c. p. 109. (w) L. c. T. 1. Abschn. 3. Cap. 6. §. 387. (x) Vid. Thes. Anatom. 6. Tab. 2. fig. 4 & 5. (y) A Sett of Anatomic. Tables, Tab. 6. fig. 1 & 2. (z) Annot. Academ. L. 1. Tab. 1. f. 12. & Tab. 5. f. 1, 3, 4 & 5. (a) Anatom. uteri gravid. Tab. 33. fig. variae, & Tab. 34. fig. 2. (b) L. c. Libr. 3. Tab. 8. fig. 4.

II°. In gravidis, quae jam aliquoties pepererunt, & in quibus propterea laxius est uteri orificium, ita ut post quintum vel sextum gestationis mensem commodè digitus ei immitti, & hujus ope ad membranas pertingi possit, saepissime jam illo tempore caput foetus orificio uteri innitens reperitur; variis hoc confirmat exemplis ONYMOS (c), item SMELLIE, MONRO, BOEHMER, CAMPER (d) nec non VAN DOEVEREN (e), idemque & mihi saepius experiri contigit. Non audiendus itaque BURTON diserte hoc negans (f), quippe cujus asserta magis ab invidiae & aemulationis, quam veritatis studio profecta sunt.

III°. Sectiones gravidarum, ante celebratum illum circumvolutionis terminum institutae, nostram opinionem quam maxime confirmant; hae enim frequentissime illum situm exhibuerunt, quo foetus capite deorsum vergit: idem jam testantur COLUMBUS & PLATERUS ll. cc. eundem illum situm viderunt PAWIUS (g), DE LA MOTTE (h), NOORTWYK (i) in foetu quatuor mensium illum observavit; porro SMELLIE (k), ROEDERER (l), Cel. VAN DOEVEREN in duabus gravidis, quarum altera tertium fere, altera quartum cum dimidio graviditatis mensem attigerat (m); Cl. MARTIN in gravida, quae ad quintum graviditatis mensem pervenerat (n); WHITE in gravida sexto gestationis mense mortua (o); nec non HUNTER, qui quarto mense decurrente, quinto mense ineunte, nec non sexto a conceptu mense huncce situm in cadaveribus lustravit (p). Nec aliquid contra nos facit nonnullorum objectio,

qua-

(c) *Diff.* l. §. 14 & 15. (d) *LL cc.* (e) *L.* 2. p. 112. (f) In a letter to W. SMELLIE, Lond. 1753. p. 97. (g) In *Obss. Anatom. select.* 6. ad calcem TH. BARTHOLIN. *Hystor. Anst. rarior.* Cent. 4. (h) *L. c.* *Livr.* 1. *Obs.* 53 & 55. (i) *L. c.* §. 18. (k) *L. c.* *Tab.* 6 & 8. (l) *Icon. uteri humani* *Tab.* 5. (m) *L. c.* C. 6. §. 7. & C. 7. §. 13. (n) *L. c.* (o) *L. c.* *Case* 1. p. 242. & seqq. (p) *Tab.* 31. *fig.* 2. *Tab.* 27 & 23.

quali usus quoque fuit MAURICEAU (*q*), qui COLUMBUM temeritatis accusat, quod ea, quae observationes illum docuerant, in medium protulerit contra omnes alios, qui ante eum scripserant, eorumque de situ foetus errorem inde arguit, quod juxta eum naturalis foetus positio a morte tam matris, quam ipsius foetus, ita possit mutari, ut omnia infantis membra facile extra suum situm ponantur. Verum praeterquam quod argumentum hoc facile inverti, & adversariorum observationes, quibus forsan suam sententiam stabilire conantur, infirmari possent; illud unice notamus, non eam esse mortis vim, ut certas gravitatis leges mutet, neque caput infantis, si viva matre in fundo uteri haeserit, post mortem adeo pondere augeri posse, ut jam inferiora petat; quapropter cum in plurimis sectionibus hicce situs occurrat, quam maxime naturalem eundem pronunciare haud dubitamus.

IV^o. Denique abortus, qui saepissime capite praevio prodeunt, hanc veritatem abunde confirmant, docent id ipsum MAURICAEI observationes, qui versionis ope tales foetus extraxit (*r*); similes casus habet DE LA MOTTE (*s*), SMELLIE (*t*), nec non ROEDERER (*u*), Celeb. VAN DOEVEREN in quadrimestri & quinquimestri partu idem observavit (*v*), & neminem dari inter Obstetricantes existimo, qui non aliquando in Artis exercitio eadem viderit; hinc mirari maximopere subit, quomodo STEINIUS ad defendendam foetus circumvolutionem hoc argumentum proferre potuerit; infringi scilicet quam maxime eorum opinionem, qui caput infantis jam a conceptionis initio naturaliter inferiora versus collocatum esse censeant, ex eo, quod abortus numquam capi-

(*q*) *L. c. Livre 2. Chap. 5. p. 234.* (*r*) *Vid. Observat. 59, 216 & 651.* (*s*) *L. c. Livr. 1. Chap. 21.* (*t*) *L. c. Book 3. Chapt. 1. Sect. 1. T. 1. p. 181. & T. 2. p. 213. & seqq. Collect. 13.* (*u*) *Elem. Art. Obst. §. 732.* (*v*) *L. c. C. 7. p. 115. §. 16. & C. 10. p. 156. §. 6.*

capite praevio nascantur (w); contrarium enim ex allatis observationibus satis superque patuit.

Docent itaque, quae protulimus, argumenta, naturalem & maxime frequentem foetus in utero situm esse, quo caput deorsum, pedes sursum spectant, inania idcirco esse, quae tam Veteres, quam Recentiores adversus hanc sententiam proposuerunt, ut suam de circumvolutione theoriam confirmarent. Utut haec ita sese habeant, non tamen credendum, adeo perpetuam esse illam positionem, ut non saepissime ab ea deflectat foetus, praesertim in initio graviditatis, cum liberius se movere possit, ob majorem copiam aquarum respectu foetus magnitudinis tunc obtinentem; constans tamen magis hic situs evadit in progressu, ubi aquis imminutis & crescente foetus volumine, nec tam libere nec tam facile eosdem valeat exserere motus, etsi nonnumquam sub ipsis etiam partus doloribus vario modo sese vertat; atque ita intelligitur, cur in abortu aequae ac in partu maturo diversae saepe a capite partes prodeant; & cur exploratione instituta, modo caput tangamus, modo repetito denuo examine, in eadem muliere aliam deprehendamus partem orificio uteri obversam (x), unde tamen non recte concluderemus, indefinitum esse foetus in utero situm, cujus contrarium jam satis evictum esse, opinamur.

An vero praestantior facta est Embryulcia, postquam doctrina de circumvolutione foetus variis fuit explosa argumentis? An aliqua inde in Artis exercitium redundavit utilitas? Tantum abest, ut hoc verum sit, si LEVRETTUM audiamus, ut maximum exinde detrimentum Ars nostra ceperit; ita enim ille (y):

Car loin que ce nouveau sentiment soit propre à faire faire du progrès à l'Art
des

(w) L. c. T. I. Abschn. 3. C. 6. §. 388. (x) Conf. imprimis Celeb. VAN DOEVEREN l. c. C. 7. p. 118. (y) In *Essai sur l'abus des règles générales*, &c. Chap. 1. Articl. II. Sect. 2. p. 92. in fine.

des Accouchemens, il l'est au contraire à faire commettre des fautes irréparables en déterminant ceux qui s'assujétiroient à ce nouveau préjugé à prendre le faux travail qu'occasionne souvent la culbute subite pour un vrai travail & par là risquer implicitement d'être coupable d'avoir prématuré la sortie de l'enfant: sed panicus hic metus omnino dicendus, quippe quod omnis Obstetricans, licet huic doctrinae non faveat, si rerum suarum sit peritus, facile dolores sic dictos praeparantes, circa finem graviditatis sese manifestantes, atque adeo secundum LEVRETTUM cum hac circumvolutione coïncidentes, a veris distinguere poterit; haec enim inversio non adeo cum istis doloribus connexa est, ut hi absque illa locum habere non valerent, quapropter noxas ex hac doctrina oriundas imaginarias ac plane falsas pronunciare haud dubitamus.

Nobis potius, stabilita hacce doctrina, novum decus & augmentum Arti nostrae accessisse videtur; praeterquam enim quod Physiologiae multum lucis inde affulserit, omnes illi errores, qui ex adversariorum opinione orti, Artem deturpaverant, penitus abrogati, ac meliora iis substituta praecepta fuerunt. Ita nunc corrui inanis illa atque ridicula nonnullorum assertio, qua foetui octimestri jus vitae denegabant, quod tamen septimestri concederent, quia nondum hanc gesticulationem, a qua summo opere defatigari foetum credebant, passus fuerat, cui vero si partus molestiae accederent, foetum duplici hac de causa debilitatum, non facile supervivere posse, existimabant (z). Neque illa symptomata, quae gravidae versus finem gestationis experiuntur, cum LEVRET-

TO

(z) Praeter alios conferri de hac sententia possunt RUFFIUS *de Muliebr. L. 2. C. 5.* in SPACHII coll. p. 173. MERCURIAL. *de morb. mulieb. L. 2. C. 1.* ibid. p. 225. &, qui prolixè satis de hac quaestione egit, F. BONAVENTURA *de natura part. octimestr.* Venet. 1602. in folio.

TO (2*) aliisque, ab hac inversione sunt repetenda, quum magis irregulari motui foetus & levioribus uteri, ad partum sese praeparantis, contractionibus illa debeantur; multo minus, si motus tales gravida perceperit, hinc faustum partum, & capite praevio proditurum foetum, praefagire licebit, uti a nonnullis Obstetricantibus fieri consuevit, qui etiam in ipso partu foetus situm plane non explorant, putantes, se officio satisfecisse, si ex parturiente quaesiverint, an foetus circumvolutatio facta fuerit (a); evenit enim saepissime, ut in partu caput primum non prodeat in illis, quae talia symptomata senserint, a dictis causis derivanda. Hinc denique etiam apparet, quam maxime errare illos, qui omnem perversum situm foetus illi inversioni, vel plane non factae, vel male directae tribuunt; licet enim non negemus, per motitationes foetus aliquando fieri, ut diversis a capite partibus sese offerat, minime tamen concedimus, illud contingere a determinata quadam rotatione, statuto graviditatis termino locum habente.

Haec de foetus inversione; sequeretur jam, ut situm, quem capite pendulo observat, accuratius describeremus, visuri, quaenam sit capitis ejus respectu pelvis positio, quinam etiam corporis ad corpus matris habitus; quum vero nunc de praecipuis quibusdam partus momentis, quae ad Embryulciam spectant, sit agendum, hancce quaestionem ad sequens Caput relegamus.

(2*) L. c. p. 90. & seq.
1726. p. 25.

(a) Conf. T. MASER *diff. de erroribus obstetricum*, Argent.



S E C T I O T E R T I A.

PRIMARIA PARTUS MOMENTA.

C A P U T P R I M U M.

DE TRANSITU FOETUS PER PELVIM.

Nullam in Veterum scriptis mentionem fieri de modo, quo foetus in partu naturali per pelvim progrediatur, nemo mirabitur, qui eorum de partibus, quas nascendus infans percurrere debet, radiorem cognitionem ex ante dictis perspexerit; etenim sufficebat illis notasse, naturalem maxime esse illum infantis situm, quo capite praevio nasceretur. Nec multo melior fuit plurimorum Recentiorum doctrina; hi enim, quum in exitu pelvis faciem foetus os Sacrum respicere observarent, eundem tali modo etiam esse locatum in introitu pelvis, asseverabant. Alii vero non per explorationem solum, sed & per sectiones parturientium in partu demortuarum, confirmati, & attendentes ad mutuam relationem, quae in partu perfecto inter pelvim bene formatam & rite proportionatum caput infantis intercederet, longe meliora docuerunt; statuentes, varium esse capitis situm pro varia partus periodo, diametros ejus majores maximis pelvis, minores vero minimis ejusdem cavi respondere, lateralem itaque esse capitis positionem in ora pelvis superiore, quae pro vario capitis descensu

in rectam mutaretur, ita ut in apertura demum inferiore facies ejus ad os Sacrum foret conversa.

Primus hanc theoriam proposuit F. OULD (*b*), in eo tamen hallucinans, quod aliam capiti, aliam trunco foetus directionem tribueret, ita ut mentum non thoraci, sed alterutri humero incumbere statueret. Egregie hunc errorem correxit SMELLIE (*c*), qui, licet eadem de capitis situ docuerit, in eo tamen ab OULDIO dissensit, quod asseruerit, totum infantis corpus eandem directionem sequi, ita ut lateribus suis abdomen & lumbos matris respiceret, adeoque mentum non humero, sed pectori esset appressum. Habendus itaque Celeberrimus hic Vir pro vero eximiae doctrinae statore, quam postea primi in arte Magistri adoptarunt, quaeque nobis etiam verissima videtur, quapropter breviter illam describemus.

Capitis itaque per pelvim transitum hoc modo fieri statuimus, ut, sutura sagittali juxta diametrum obliquam directa, diameter capitis longitudinalis toti superincumbat diametro majori aperturae pelvis superioris; partu deinde ulterius progrediente, caput in mediam pelvim propulsum incurrat in os Ischii, unde levi rotatione facta facile declinatur, ut facies in partem ossis Sacri anteriorem maxime concavam dirigatur, occiput vero versus anteriora sic protrudatur, ut haec pars prima prodeat, donec tandem totum caput e pelvi excutiat. Ex quibus facile elucescit, hac ratione quam optime diametros capitis pelvis dimensionibus adaptari; etenim cum pelvis superioris orae maxima sit diameter obliqua, juxta hanc etiam posita est dimensio capitis longitudinalis, cum vero in apertura inferiore inversa obtineat ratio, repressa inprimis

coc-

(*b*) In *Treatise of Midwifery*, Londin. 1748. p. 28. (*c*) *L. c.* Book. 3. C. 1. S. 1. T. 1. p. 178. & Book. 3. C. 2. S. 2. T. 1. p. 208. *Collect.* 13. N. 1. T. 2. p. 213. & *passim* in tabulis.

coccyge, oppositam idcirco directionem observat caput, ut nunc futura sagittalis in conjugata sit locata, quo egregio artificio facilis admodum & tutus sit capitis foetus per pelvim transitus.

Quum vero basis totius Artis merito sit habenda haecce doctrina, & nonnulli dentur inter Recentiores, qui hanc theoriam oppugnant, operae pretium esse duximus, variis argumentis eandem hic propositam confirmare, atque simul fusius explicare causas & rationes, quae hanc situs capitis mutationem in partu perfecto producant, quorum omnium primaria nunc annotabimus.

I^o. Huc facit prominens columna vertebralis, qua minor redditur uteri capacitas inter spinam ac ventrem matris, quam quae in lateribus obtinet; hinc fit, ut curvatum foetus corpusculum, capite pendulo, maxime sibi commodum situm eligat, ad latera deflectat, ac dorso & abdomine Ilia matris respiciat (*d*).

II^o. Gravidarum sectiones saepius huncce situm lateralem capitis exhibuerunt: ita PAWIUS in foemina per sex menses gravida jam observavit, faciem & corporis partem anteriorem latus sinistrum matris spectare (*e*); hunc situm etiam viderunt NOORTWYK (*f*), ALBINUS (*g*), SMELLIE (*h*), GARROW (*i*), CAMPER in quinque gravidis (*k*), ROEDERER (*l*), VAN DOEVEREN (*m*), Celeb. LOBSTEIN, quem in Anatomicis & Chirurgicis Praeceptorem habuisse licuit, bis eundem situm observatione compertum habuit (*n*), & praeparatum prostat in theatro Anatomico Argentinenfi, in quo

ean-

(*d*) Conf. imprimis SMELLIE *l. c.* Book. 3. C. I. S. I. & Celeb. VAN DOEVEREN *l. c.* C. 7. p. 124. §. 18. (*e*) *L. c.* Obs. 6. p. 12. (*f*) *L. c.* §. 18. p. 14. (*g*) In *Tabul. uteri gravid. Appendic. Tab. 1.* (*h*) Passim in *Tabulis.* (*i*) Apud SMELLIE *Collect.* 13. N. 1. T. 2. p. 216. (*k*) *L. c.* p. 25 & 26. (*l*) In *Tab. uteri gravidi, Tab. 5.* (*m*) *L. c.* & saepius deinceps eundem situm sese vidisse, mecum communicavit Vir Celeb. Conf. etiam egregia Diss. Doctiss. J. P. MICHELL de *Synchondrotomiae pubis utilitate in partu diffic.* Lugd. Batav. 1781. p. 4. (*n*) In Diss. Doctiss. E. FAIES de *usu forcipis in partu,* Argentor. 1771. §. 7. p. 15.

candem nobis demonstravit positionem; porro aliquoties in gravidis se hanc fecisse observationem in suis collegiis testatur Celeb. J. M. ROEDERER (o), Praeceptor in Obstetriciis plurimum colendus, (cujus insignis erga nos benevolentiae gratissima semper erit recordatio,) item HUNTER ex gravidis 4, 5, 6, 7, 8 & 9 mense mortuis hunc situm delineavit (p); MARTIN (q), WHITE (r) nec non SANDIFORT (s) idem conspexerunt. Ex his binis argumentis apparet, erroneam esse illorum sententiam, qui censent, in introitu pelvis ita locatum esse caput, ut futura sagittalis in conjugatam cadat, facie os Sacrum, occipite pubem spectante, tum demum vero huncce situm mutari, cum a doloribus impulsus caput magnam resistantiam patitur a prominentia ossis Sacri, quae in posteriori parte segmenti inferioris uteri ita impressa est, ut promontorii adinstar foetus frontem glabram, rotundam, unico in puncto tantummodo illam tangentem & satis mobilem, blando motu ad latus convertat in spatium diametro obliquae respondens; ita sentiunt LEVRET (t) & SAKTORPH (u). Cum vero in gravidis, nullos ad partum dolores expertis, hic situs observetur, dubium non est, quin talis jam ante partum locum habeat, nec a doloribus demum producat, quod idem uteri major in hac regione capacitas confirmat (v).

III°. Si in initio partus situm capitis exploremus, talem deprehendimus futurae sagittalis directionem, ut juxta diametrum pelvis obliquam sit locata (w), quod ipse in Gynaeceio Argentinenfi aliquoties expertus fui.

IV°. In

(o) Conf. Doct. J. J. BUSCH *diff. de partu natur. diff. propter humerorum iniquum situm*, Argent. 1775. §. 5. p. 7. (p) Vid. *Tabul. uter. gravid* 6, 12, 20, 21, 23, 27 & 31. (q) *L. c.* (r) *L. c. Case* 1. p. 242. (s) *Obff. L. 2. C. 1. p. 47 & 48.* (t) In *Observat. sur les accouchem. labor. &c.* p. 71. (u) *Theoria de diverso partu*, p. 19. (v) Conf. BAUDELOCQUE *l. c. T. 1. §. 632.* (w) Vid. SMELLIE *Tab. 10, 11, 12 & 13.* nec non *l. c. Book. 3. C. 2. S. 2.* egregie etiam hanc rem pertractavit BAUDELOCQUE *l. c. T. 1. part. 2. Chap. 2. Sect. 2. & Sect. 5.* nec non PLENCK *l. c. p. 46.* aliique.

IV^o. In partus progressu si explorationem instituamus, non eandem inveniemus, quae olim fuerat, capitis positionem; mutata tunc futurarum directio ita est, ut futurae lambdoïdeae medium in axi pelvis haereat, fontanella vero & futura sagittalis versus ossis Sacri cavum sit conversa, ut cum diametro majore coïncidat; agentibus enim doloribus magis magisque ad pectus apprimitur infantis mentum, descendit itaque occiput & pelvis axi sit propius, eodem autem tempore caput a causis antea notatis inversum, eum adsciscit situm, quo in partu naturali exire solet, qui sic tandem absolvitur; scilicet antrosum protruditur occiput, donec sub arcu pubis primum sese offerat, ac vertex circa axin suam e cavo ossis Sacri anteriora versus volvatur, atque tali ratione majori pelvis inferioris aperturæ maxima capitis diametro respondente, facillime nasci potest infans. Hunc mechanismum inter alios optime descripserunt SMELLIE, qui caput tali modo conversum etiam repræsentat. (w*), nec non PLENCK (x) & BAUDELOQUE (y), qui hunc motum vocat *mouvement de pivot*: saepius & hanc mutatam futurarum directionem sentire mihi contigit, imo nonnumquam, aquis effluxis, explorationem instituens dum caput in directione laterali locatum manifesto sentirem, urgente tunc temporis vi dolorum, hancce capitis versionem expertus fui, ita ut, digitis parti posteriori fontanellæ applicatis, hunc capitis motum circa axin quam evidentissime percipere possem: simili quadam observatione FRIED junior, contrariae olim sententiae addictus, erroris sui convictus fuit (z).

Ex iis, quæ adduximus, argumentis, satis superque stabilita videtur doctrina Smelliana, de capitis foetus per pelvim transitu, quippe quæ partum;

(w*) Tab. 14, 15 & 18. (x) L. c. p. 47. (y) L. c. T. I. § 636 & 637.
(z) Vid. D. G. D. PEGELOW *diff. de foetus brachio in partu prodeunte*, Argent. 1772. p. 28. not. y.

rium fabrica, observationibus optimorum Obstetricantium & oeconomiae animalis legibus egregie nitatur; missam ergo hanc quaestionem facere possemus, nisi contrariae sententiae patroni, pristinae opinioni pertinaciter adhaerentes, nonnulla in medium proferrent argumenta, quibus doctrinam nostram evertere conantur, quorum praecipua tantum allegabimus.

1. Objiciunt BURTON (a) & ROEDERER (b), non naturalem, quin difficilem esse illam partus speciem, qua foetus facies ossa Ilia spectat. Et haec licet vera sint, neutiquam tamen aliquid contra nostram sententiam faciunt; naturalis enim est lateralis positio in superiore pelvis ora, ad inferiorem vero ejus aperturam maxime praeternaturalis, ad quam distinctionem inprimis animadverti hic debet.

2. Inferunt iidem Auctores ll. cc. nullam esse vim vertentem in utero, qua foetus prius oblique positus versus os Ilia, dein mutata directione ad os Sacrum verteretur. Et sane, similem vim utero inesse, nos quoque ignoramus (b*), neque dependet illa situs mutatio ab utero; partes enim, quas transire debet foetus, quam maxime hic in censum venire debent, inprimis autem in nostro casu ad ossa Ischia est respiciendum, in quae incurrens major capitis diameter, ob inversam orae inferioris pelvis mensuratum relationem, in ampliorem diametrum ita dirigitur, ut levem rotationem, juxta declives eorum partes gliscens, experiatur, & caput circa axin vertatur.

3. Opponit praecipue ROEDERER (c), nullas diametros in descensu suo ob-

(a) In *a new System of Midwif.* p. 120—123. (b) In *Icon. uteri gravid.* p. 21. in notis. (b*) Demonstrare quidem annis fuit C. M. THODE in *Diss. de partus mechanismo*, Lugd. Bat. 1777. talem vim in utero & vagina haerere, quae foetus situm pro vario partus stadio mutaret, sed parum valent, quae ad hunc mechanismum (qui necessario ex ipsius pelvis fabrica repeti debet,) probandum, adduxit argumenta. (c) *L. c.* lit. γ.

observare caput, nec parallelo cum iis ductu decurrere, dum per pelvim progrediatur foetus; occiput enim primum descendere, mentum firmiter pectori incumbere, conum itaque formare caput, cujus apex est in occipite, basis in facie, deirco perinde esse, qua ratione dirigatur, modo pars capitis conoïdea sit praevia, mentumque sternum inhaereat: addit porro, optimam fore nostram sententiam, si pelvis nuda consideretur, sed respiciendas quoque esse partes molles, vaginam inprimis, per quam sub arcu pubis dirigitur occiput, quod fieri non posset, si vera nostra theoria foret. Sed huic assertioni refragantur omnia, quae adduximus, argumenta, & inprimis exploratio, cujus ope futurae sagittalis obliquam directionem, & dein in rectam mutatam, evidenter persentiscere valemus: praeterea descensus capitis non tali ratione contingit, ut diametros suas non observet; equidem occiput conum format, & in progressu ejus futurae lambdoïdeae medium in axi pelvis haeret, sed nihilominus dimensiones suas pelvis diametris accommodat; hoc enim si non contingeret, haud facile exiret pars capitis, quae trunco proxima est, seu facies, quae mento pectori incumbit: &, quod magis est, distantia, quae datur inter basin ossis occipitis & prominentiam ossis frontis, longe major est, quam quae inter tubera ossium verticis invenitur; cum autem juxta hanc diametrum procedat, sponte apparet, longe melius per pelvis majorem dimensionem transire posse, quod re vera in partu etiam obtinet: unde liquet, non perinde esse, in quam directionem caput progrediatur, modo conoïdea occipitis pars prodeat. Altera vero hujus argumenti pars minime nos tangit, siquidem partes molles in partu cedentes diametrorum rationem non invertant, & alio modo pelvim intrare foetum, alio modo exire, pluribus antea evictum fuerit.

4. Aliud tandem proferunt argumentum, praesertim BURTON (d) & STEIN (e),

foe-

(d) In a letter to SMELLIE, p. 101. & seq. (e) L.c. T. 1. Abschn. 4. Cap. 7. §. 558.

foetum tali ratione per pelvim non transire in partu naturali, ubi apte conformata pelvis suas habet dimensiones, & foetus caput diametros naturales haud excedit; tum demum SMELLII doctrinam veram esse, si inaequalis sit partium matris ac foetus relatio, ita ut conjugata justo sit angustior, aut foetus caput dimensiones solito majores habeat; tali enim in casu delabi caput a rotundo ossis Sacri tubere, & ad latus converti eo tempore, quo supra illud os descendit: lateralis autem si obtineat situs, pelvi ac capite rite factis, vitiosum omnino & praeternaturalem illum esse habendum, declarant. Sed facilis est adversus hosce Viros responsio; si enim naturale vocari debet illud, quod plerumque contingit, noster situs quam maxime naturalis omnino est censendus, hunc autem inter frequentissimos observari, omnes fere Embryulci fatentur, adeo ut Celebris hujus aevi Obstetricans BAUDELOCQUE (*f*), qui in solo Artis nostrae exercitio occupatur, testetur, illam positionem, quam contrariae sententiae fautores naturalem appellant, esse quam rarissimam, (*on ne peut plus rare*); nullus autem eo dementiae perveniet, ut vitiosam partium conformationem in plerisque locum habere censeat, naturalem non nisi in paucis.

Stat igitur Recentiorum opinio de transitu capitis foetus per pelvim, partium fabrica & observationibus egregie suffulta, atque ab adversariorum argumentis vindicata: mirari ergo subit, quomodo & hodie tales dentur obstetricantes, hocce dogma impugnantes; condonandus quidem hic error est BURTONO, cujus libellus non ex veritatis amore, sed ex singulari quodam in SMELLIUM odio est profectus, quomodo vero STEINIUS, qui ex frequenti, qua occupatur praxi, facile hanc doctrinam adsequi valeret, Smellianae sententiae adversarius esse possit, equidem non perspicio. Hisce de capitis transitu pertractatis,

videa-

(*f*) L. c. T. I. § 627.

videamus nunc, quamnam directionem truncus observet, dum per pelvim moveatur.

Quum caput juxta diametrum obliquam ut plurimum procedat, truncusque in eadem, qua caput, directione sit, quod male negaverat OULDIUS, facile exinde apparet, eandem hancce intrare truncum, sed oppositam, ita ut, si facies articulum sacro-Iliacum dextrum respiciat, sinister humerus sinistrae quoque eidem conjunctioni respondeat, dexter vero ad acetabulum oppositi lateris sit conversus; ambo tunc in eadem directione descendunt, donec caput ex sinu prodierit, quo facto, ita mutatur eorum situs, ut secundum maximam aperturae inferioris diametrum ex pelvi exeant; eodem enim, quo caput, modo ab ossibus Ischii invertuntur, ita ut, qui ad nexum ossis Sacri cum Ilio positus erat humerus, in cavitate ossis Sacri recipiatur, qui vero ad acetabulum locatus erat, sub arcu pubis gliscat: adeoque humeri eadem, qua caput, ratione suas diametros pelvis dimensionibus accommodant, egregio ad facilitandum partum artificio. Mirum sane videbitur unicuique, quâ factum fuerit, ut haec humerorum inversio tam diu latuerit obstetricantes, ut non nisi ante paucos annos fuerit exposita, quum haec conversio oculis adeo obvia sit, ut vix obstetricantes effugere potuerit, qui tamen omnes in suis libris hanc neglexerunt, nihil hac de re memorantes, nisi quod, nato capite, facile insequeretur truncus, cum nihil adsit, quod huic moram injiceret. Inter primos, qui hanc inversionem notarunt, nominandus est C. WHITE, qui etiam errores ex ea neglecta commissos reprehendit (g); quam postea etiam descripserunt BANGIUS (h), BAUDELOCQUE (i),

CA-

(g) *L. c. p. 88.* & seqq. nisi velimus, hoc jam indicasse SMELLIUM *l. c. Book 3. C. 2. S. 2. T. 1. p. 212.* quod tamen obscurum videtur. (h) *Diff. l.* (i) *In minor. compend. C. 6. Sect. 1. & L. c. T. 1. §. 642, 651, 656, 664, 667, 675, &c.*

CAMERER (*k*), & in Gynaecio Argentinenſi hanc humerorum mutationem ſaeppiſſime oculis haurire nobis licuit.

Eximium ergo mechanismum, quo tam caput, quam reliquum corpus foetus per pelvim tranſeunt, ex allatis argumentis evidentiffime demonſtratum eſſe, cenſeo: nullus ergo dubitabit, quin ex hoc fonte manant praecepta, quorum ſummus eſt in Arte uſus, & ab hujus inventi epocha demum rationale ac partium fabrica fundatum fuiſſe ejus exercitium. Etenim in partu naturali exinde dijudicamus, an rectus obtineat ſitus, quem ſi non obſervet deſcendens caput, & a naturali deſſectat, artificiiſ variis, quae non una eademque ſunt ad omnes pelvis oras, & pro vario partus progreſſu diverſa, eundem corrigere ſtudemus. Ex humerorum inverſione naturali etiam apparet, non extrahendum eſſe foetum, antequam hanc rotationem ſubierint humeri, qua cautione omiſſa, plurima oriuntur mala, uti, cum de Adminiculis in partu agemus, ſaiſus explicare annitemur. Sed & in omni partu difficili & praeternaturali, ſi vel verſione, vel forcipe, vel ſectiōe educendus eſt foetus, hae pelvis diſenſiones, foetusque ad eas relatio ſollicite ſunt obſervandae, ut facilius & tutius in lucem poſſit edi infans, & hac de re egregie meritus fuit SMELLIE, qui ſuae theoriae omnem quoque praxin accommodavit. Quanta vero damna ex non rite perſpecta haece relatione naſcantur, ſola artificialis foetus inverſio evidenter docet; nato enim infantis corpufculo, ſi ad aperturam ſuperiorem haereat caput, ita ut facies os Sacrum ſpectet, maxima ſaepe opera ab imperitis impenditur, foetui ſumme periculofa, ut juxta hanc diametrum caput protrahant, quod facillime & ſponte ſua ſequeretur, ſi immiſſa manu ad latera paululum inverteretur, quo artificio major ejus diameter majori pelvis diſenſioni adaptatur; hac autem cau-

(*k*) Vid. *Diff. de foetus per pelvim tranſitu ſub partu naturali*, Tubing. 1778.

cautela neglecta, inanis opera luditur, & funesta evadit infanti diuturna illa ad pelvis oram superiorem mora, unde funis compressio, & spinæ luxatio, quæ nonnunquam rudiores istam tractionem sequitur, metuenda: ipse LEVRET hujus methodi utilitatem expertus fuit, ubi facta versione & facie ad os Sacrum conversa, diu in extrahendo foetu frustra desudasset, dein capite ad latera reclinato, facillime infantis educationem absolvit, ut postea in simili casu semper hancce encheiresin adhibuerit (1).

Sufficiat ex his ostendisse, latissimum esse hujus egregiæ doctrinæ usum, & in omni fere partu tam naturali, quam præternaturali maximam illius rationem, esse habendam: quæ omnia cum Veteribus fuerint incognita, Artem nostram insignem hujus accessione adeptam fuisse perfectionem, omnes mecum consentient, qui, quanta sit hujus inventi præstantia, ex ante dictis intellexerint.

C A P U T S E C U N D U M.

D E A D M I N I C U L I S I N P A R T U.

Inter omnia partus naturalis adminicula primarium locum tenet

I. APTA PARTURIENTIS COLLOCATIO, quæ matri maxime commoda virium inutilem dilapidationem prohibet, & infantis nascendi exitum optima methodo promovet, cavetque, ne huic in ipsa nativitate quaedam inferatur noxa.

Antiquissimis jam temporibus hujus rei utilitatem perspicientes Medici, va-
ria

(1) Vid. *Sulte des accouchem. labor.* p. 151.

ria excogitaverunt auxilia, huic fini implendo idonea: ita Veteribus ad partum absolvendum & felicius expediendum duplex in usu erat adminiculum, Lectus scil. & Sella Lochiaea sive Obstetricia, in quibus aut jacentes aut sedentes puerperae commodius liberari possent; quae omnia ex multis Veterum locis abunde confirmantur, ut maxime miremur, quod RAMAZZINI asserat: *Sibi non satis compertum fuisse, utut curiose in hanc disquisitionem incuberit, num apud Veteres puerperae super sellas, an in lectulis foetus suos edere pro more haberent (m).* Apud antiquissimam Hebraeorum gentem jam in usu fuisse sellas obstetricias, haud obscure intelligi potest ex loco quodam *Exodi*, ubi durum habetur istud Regis Pharaonis mandatum, quo jubebantur Obstetrices, omnem prolem masculam vix in lucem editam protinus enecare: *Hebraeis parturientibus si opem feratis, easque super sellas videatis; quodsi masculus fuerit, ipsum occidite (n)*; ita saltem versio Belgica, quam omnino probandam censet D. W. TRILLER (o). HIPPOCRATES, licet de sedilibus aut lectis in partu naturali mentionem non faciat, de sellis tamen loquitur, quibus imponebantur parturientes, si secundinae non facile sequerentur, hae autem prorsus convenire videntur cum illis, quas reliqui Graeci in partu ad manus habere solebant: *Quod si supra lasanon sedere nequeat, in sella recubitoria perforata locetur: Si vero prae imbecillitate prorsus sedere nequeat, lectum a capite quam erectissimum exstruito, ut deorsum declinet, sicque foetus suo pondere quam maxime deorsum simul trahat (p)*: unde liquet, sellam hanc jam fuisse instructam fulcro dorsuali seu *recubitorio*, atque foramine rotundo, per quod

(m) Vid. ejus *Oper. omn.* p. 547. Genevæ 1717. (n) In *Cap. I. v. 16.* (o) In *Clinotechn. medic. antiquar.* Francof. 1774. §. 155. (p) In *Libr. de superfoet.* p. 261. l. 21. Conf. FOESSI *Oeconomia*, in voce *ἄστυον* & *ὑπεκλίσις*.

quod foetus facilius exire posset: alibi commendat lectum concussibilem, mobilem, ad promovendum abortum aut foetum mortuum, exire negantem (q); quo in casu CELSUS etiam jubet *mulierem transverso lecto collocare* (r): haec vero cum ad partum laboriosum & non naturalem pertineant, hujus non adeo sunt loci.

GALENUS expresse scripsit, in sellis suos foetus edere parturientes: *Obstetrices ipsae non ilico parturientes surgere jubent, nec in sella collocant, ——— postea vero, quum ad partus transitum satis patet* (os vulvae) *surgere mulierem jubent & in subsellio collocant* (s).

Plurima vero ad scopum nostrum spectantia habet MOSCHIO; hic enim, cum in partus initio ambulationem, olim laudatam, fieri haud permittat, quia *infantem prope foris situm reprimit, & matricem quassat* (t), suadet: *Ut ponatur supina in lecto, qui duris est stratus* (duos autem lectos conducere notaverat (u), durum in partu, mollem post partum,) *conduplicatis illi pedibus, & apertis. Cumque ad magnitudinem ovi in orificio matris (chorium) invenerimus, ad sellam eam levamus* (v); quam sellam dein descripsit esse *ut cathedram* (w), latius vero eandem exponit, dicens: *Sella obstetricalis est sicuti sella tonsoria, in qua sedetur, ita ut habeat sub sexu similitudine lunae foramen praecisum, ut illuc infans cadere possit* (x): ex quibus constat, sellam ab illo laudatam fuisse, quum partus proxime instaret, lectum vero huic substitutum fuisse, quoties mulier esset defatigata: *Si ita fuerit lassae, ut in lecto parere debeat, ibi pariat* (z): quod si sella descripta in promptu non foret, vult, *ut in mulieris femoribus sedeat, ibique pariat* (a).

Ea-

(q) In *Libr. 2. de morb. mulier.* p. 617. quem locum amplissima commentatione affectit M. CORDAEUS in *Comment. 6. in HIPPOCRAT. Lib. 1. de muliebr.* in SPACHII *collection.* p. 677. (r) *L. c. L. 7. C. 29. p. 489. l. 31.* (s) *de natur. facultat. L. 3. C. 3.* (t) *L. c. part. 1. C. 10. N. 4. p. 9.* (u) *N. 48. p. 4. in Graeco exemplari.* (v) *L. c. part. 1. C. 10. N. 5. p. 9.* (w) *L. c. C. 9. N. 6. p. 8.* (x) *L. c. N. 5.* (z) *L. c. C. 10. N. 5. p. 9.* (a) *L. c.*

Eadem etiam MOSCHIONIS methodus reliquis Graecis familiaris fuit; ita enim AEGINETA: *Tempus desessus in sellam est, cum osculum uteri apertum digito occurrerit, & praeruptio prominuerit (b), & cum his consentiunt, quae habet AËTIUS (c): iidem quoque, si mulier obesa est, aut ob lumborum cavitatem difficilis est partus, eam in lecto aut sella pronam & flexis genibus collocandam esse praecipiunt, ut hac positione juxta AEGINETAM uterus ad abdomen delatus e directo osculi sit, vel quemadmodum AËTIUS explicat, ut vulva delabens cervicem recta extendat: foetu autem mortuo & in difficili partu, mulierem in lecto ponendam, eique alligandam, commendat AEGINETA (d). Nec apud Arabes alia in usum tracta fuisse videntur, jubet quidem in partus initio AVICENNA: *Ut sedeat mulier hora una, & tendat pedes suos, deinde resupinetur super dorsum suum hora una: postea surgat subito, & ascendat gradus, & descendat, & clamet; instante tamen partu & orificio uteri aperto, sequentia habet: Et melius super quod sedetur apud partum, est scamnum, posito pulvinari post ipsam: & istud fiat post apertionem oris matricis (e), & alibi (f): Fac eam sedere super scamnum.* ALBUCASIS sedem pariter laudat, aut ut mulieres teneant eam, praecipit (g); an vero scamnum, quod Arabes memorant, a sella diversum fuerit, difficile quidem ex eorum Scriptis conjici potest. Quae hucusque dicta sunt, antiquissimum fuisse sellarum usum, abunde confirmant, quod ulterius comprobatur TRILLER (h) ex Nummo Genethliaco Imperatoris ANTONINI PII, quem ex G. CUPERO in Synopsin suam de Antiquitat. veteris puerperii transtulit C. BARTHOLI-*

NUS

(b) L. c. L. 3. C. 76. p. 491. (c) L. c. Tetrab. 4. Serm. 4. C. 22. p. 789. (d) L. c. L. 6. C. 74. p. 582. (e) L. c. L. 3. Fen. 21. TraB. 2. C. 23. p. 722. (f) L. c. C. 24. p. 723. (g) Vid. method. medend. L. 2. C. 75. in SPAGN. p. 443. (h) L. c. §. 154.

NUS (i), in quo numismate, conjiciente SEGUINO, FAUSTINAE puerperium repraesentatur, quae seminuda in ejusmodi sella obstetricia sedens conspicitur, post partum tamen, (infans enim fasciatus ab exultante foemina in altum elevatur,) obstetrice pariter seminuda ad ipsius latus assidente; nec omni probabilitate hanc TRILLERI conjecturam destitui, docet ipsius numismatis, quod apud BARTHOLINUM invenitur, inspectio: nisi forte cum Cel. J. G. GUNZIO aliam hic sellam esse intelligendam statuamus, in qua scilicet puerperae pro lata ope vota solvere solebant (k).

Ex quibus huc usque relatis, haud obscure, nunc opinor, colligere licebit, Veteres lectis aequae ac sellis usos fuisse, ut situ etiam commodo partum adjuvarent; tum demum vero parturientes in sella collocasse, cum, rupturam minantibus membranis, mox instaret partus; si autem nimis debiles essent puerperae, aut ob praeternaturalem foetus situm, Embryotomia esset instituenda, ad lectos confugisse, quos ante partum etiam ab illis adhibitos fuisse, abunde demonstravimus.

1. Cum vero Hodierni eadem haecce adminicula in partu usurpare soleant, videamus; num & haec emendaverint, & ad usum magis idonea reddiderint. EUCHARIUS RHODION postquam in partus initio eadem fere, quae AVICENNA facienda laudasset, tum demum, *cum praegnans matricem laxari & dissolvi, humoresque largius manare sensit*, illam reclinandam ac resupinandam esse suadet, *ut neque stare jam, neque prorsum jacere videatur, ipsiusque caput resupinum pendentis formam magis, quam jacentis praebeat*: additque figuram sedilis, quo in Gallia ac Germania uti consueverant obstetrices,

quod

(i) Vid. *Commentar. ad T. BARTHOLINI synopsis Antiquit. veteris puerperii*. Amstel. 1676. p. 59. (k) Vid. *de commodo situ parturientium*, -Lips. 1742. p. 13.

quod tali modo describit, *ut ab humo non alte distet, & excavatum ita sit ut facile, quae debet, transmittat, & reclinantem tergo accipiat* (1). Nec absimile est sedile illud, quod commendat RUFFIUS (m), cui vult ut infideat parturiens, dum veri ad partum dolores urgent, quodque habet *semicycli formam, quatuor suffultum pedibus, fulcro a tergo aliquantulum retrorsum deducto*; inferius autem, ut liberioris aëris accessus arceatur & pudori consulatur, panno obvolvendum suadet. Variis dein modis has machinas corrigere studuerunt, inter quos duo inprimis memorandi veniunt, alter est, quo fulcimentum dorsuale mobile fecerunt, quod jam apud WELSCIUM habetur (n), & postea in omnibus sellis observatum fuit; alter est, quo nixibus edendis aptiores factae fuerunt, quem in finem ansas addiderunt, quas in ipsis doloribus prehendere possent parturientes, cujusmodi sedilium figurae prostant apud VAN DE VENTER (o) & VAN SOLINGEN (p), quibus etiam pedum fulcimenta adjecit Chirurgus quidam Wirtembergensis VOELTERS dictus (q). Optima vero sedilia nostra inprimis aetate excogitata fuerunt, in quibus pro lubitu fulcimentum dorsuale reclinari, atque sub ipsis doloribus manibus pedibusque firmiter inniti possunt puerperae, & hoc titulo prae caeteris laudandae veniunt sella Friediana (r), quam etiam descripsit ROEDERER (s), & Steiniana (t), quae lecti forma commode quoque adhiberi valet. Alii lectos, qui easdem habent utilitates, invenerunt, inter quos nominandus FRIED (u), cujus lectuli insignes usus enumerat ROEDERER (v), optimam quoque lecti speciem fabri-

(1) L. c. C. 4. p. 14 & 15. nec non C. 5. p. 20. (m) De muliebrib. L. 3. C. 2. in SPACH. p. 175. (n) In Edit. Germanic. SCIPION. MERCURII Artis Obstetr. (o) L. c. fig. 13. (p) *Am't en pligt der Proedvrouwen*, Tab. 1, 2, 3. (q) In libro, cui titulus *ein neuere Hebammen Schul*, Stutgard 1687. (r) L. c. Tab. 1 & 2. (s) In *Elem. Art. Obst.* §. 299. (t) In *kurze beschreibung eines neuen geburtsstuhls und Bettes*, Cassell 1772. hanc etiam delineandam curavit atque descripsit PLENCK l. c. Tab. 1. fig. 1 & 2. p. 57 & 58. (u) L. c. §. 180 — 182. Tab. 3. (v) L. c. §. 284 — 288.

bricandam curavit MECKELIUS, nullibi adhuc, quantum scio, descriptam, cujus specimen Argentorati vidimus.

Ad usum vero quod attinet, disputant Auctores, utrum sella lecto praeferri debeat, an hic illi; & sane, si istas fellas spectemus, quae immobile habent fulcrum dorsuale, in quibus nec manus nec pedes sub doloribus firmari possunt, merito hae reprobandae videntur; in iis enim dolorum intervallo nec convenienter quiescere possunt parturientes, neque Naturae conatus, quo decet meliore modo, suis nixibus adjuvare, unde partus haud raro retardatur, difficilis fit, quin imo nonnunquam funestus: ita STEINIUS (w) refert, rupturam uteri exortam fuisse in matrona quadam parturiente, cujus matrix versus anteriora obliqua erat; quamque sellae dorsuali immobili instructae insidere jusserat imperita obstetrix, nec alium ei situm concesserat. Deinde obstetrices in Germania praesertim eandem sellam promiscue adhibent, putantes omnibus convenire, nulla habita ratione corporis molis, adeo ut graciliores fere totae quantae per foramen ipsius sellae labi possint, notante MASER (x). At omnes istae objectiones non cadunt in Recentiorum fellas, siquidem illae fulcro dorsuali gaudeant, quod ad varios gradus reclinari potest, qua cautela, silentibus doloribus, egregie puerperis procuratur quies; deinde ansae & sustentacula, quibus instructae sunt, pulchre inserviunt, ut, firmiter his pedes applicando atque illas manuum opeprehendendo, dolorum efficacia quam optime intendatur; & si forte partus laboriosus evadit, aut operatione quadam est absolvendus, facilis sic datur aditus obstetricanti, ut varia, quae requiruntur, auxilia administrare possit; atque his titulis inprimis laudanda STEINII sella, in qua fere omnia recensita commoda inveniuntur, quaeque facillime etiam in lectum mutari potest.

(w) In citat. *Programmat.* p. 4.

(x) *Diff. l.* p. 26.

test. Nec tamen rejiciendi lectuli illi geniales, qui a Gallis frequenter adhibetur (*petits lits*), quorum descriptionem praeter alios optime dedit BAUDELLOCQUE (*y*): inprimis vero commendandus lectulus artificialis FRIEDII & MECKELII, quorum modo mentionem injecimus, quin & eosdem sellis praefèrendos putamus, ubi debilis admodum est parturiens, aut partus Artis ope perfici debet; sive ob pravum infantis situm, sive ob symptomata urgentia, uti haemorrhagiam, convulsiones, &c.

Minime vero probamus, qui in nonnullis Galliae provinciis solèmnis est, situm; quo parientes genubus incumbunt, manibus sellae dorsum prehèdentes (*z*); etsi enim haud absimili ratione Latona (ambabus scil. ulnis palmam circumplexa, genubus in molli prato fixatis,) Phoebum feliciter in lucem effuderit (*a*), incommoda tamen maxime haec est positio, ac praecipiti exclusionè & violenta funiculi abruptione ipse infans facilè laedi potest; tali etiam ratione placentae solutio metuenda, unde, contractiones suas haud exerente utero, haemorrhagia ac difficilis secundinarum exclusio. Notamus autem sermonem hic esse de partu naturali, omnibus juxta naturam sese habentibus; in partu enim ob uterum fundo suo ad lumbos inclinatum difficili, omnino commendandus hic situs est, quo fit, ut antrorsum feratur matrix, & orificium ejus ad axin pelvis propius accedat; sic etiam, ubi versio est facienda & pedes anteriorem uteri partem respiciunt, longe facilius in tali situ pedes invenire poterit obstetricans, quam si consueta ratione manus introducatur, imo vero, neglecto hoc auxilio, versio nequaquam perfici potest: ita tali in casu vidit Cl. Praceptor ROEDERER, omnem operam inanem luisse obstetricantes ad extra-

hen-

(*y*) *L.c. T. I. §. 756 — 758.* (*z*) *Conf. BAUDELLOCQUE l.c. T. I. §. 755.* (*a*) *Conf. SWIET. l.c. T. 4 p. 568.*

hendum infantem, ut jam nihil praeter dissectionem ejus in utero superesse crederent, ac propterea Cl. Virum in consilium vocarent, qui, facta exploratione, cum hoc modo situm infantem deprehenderet, pariente genubus imposita ac juxta anum manu utero immissa, felicissime ilico partum ad finem perduxit. Genubus etiam incumbere foeminam jubet LEVRET, si, capite ex utero jam egresso, humeri ita siti sunt, ut eorum alter ossibus pubis insideat, alter vero os sacrum respiciat, quo autem operator a posteriore foeminae parte humerum, qui os sacrum spectat, in latus convertere possit, ut hac ratione majorem diametrum pelvis intrent (*b*). Eundem hunc situm commendat ROEDERER, imprimis quando *pedes super ossibus pubis ex anteriori abdominis sede quaerendi sunt* (*c*), qui casus cum priore convenit. Cum itaque in nonnullis casibus tantae sit utilitatis haec positio, immerito illam ceu absurdam & incommodam proscribere videtur BAUDELOQUE (*d*).

Verum ut ad propositum redeamus, circa modum & tempus sedendi aut decumbendi, prout vel sellis vel lectulis utamur, id adhuc monendum, quod si partus naturalis sit, & valeat foemina, situm pro elaboratione dolorum tam diu relinquendum esse arbitrio parientis, donec caput foetus pelvis cavo ita fuerit impactum, ut digito tangi possit, id est, per duo priora partus stadia, qualia distinguunt obstetricantes; in tertia vero & quarta periodo vel sellae vel lecto esse imponendam parturientem, tuncque vario modo corpus esse inclinandum pro vario partus progressu: quum enim foetus juxta axin pelvis & vaginae in naturali statu prodire debeat, haec autem non rectam lineam describat, sed incurvam, ut antea vidimus, ita collocanda est mulier, ut uterus semper hanc observet directionem.

(*b*) Vid. *Suite des observations*, &c. p. 23.
T. I. §. 1072.

(*c*) In *Elem. A. O.* §. 393.

(*d*) *L. c.*

rectionem, & si in contractiones cleatur, infans juxta naturalem per pelvim transitum, antea latius descriptum, feratur, qua cautione vires parturientis non inutiliter teruntur, multumque iis parcitur; utero enim sic posito, cum nulla occurrant fetui obstacula, sed recte ad exitum propellatur, omnes dolores juxta mediam pelvim agunt, nec ad latera ejus eliduntur, magno sane parientis virium commodo. Talis itaque situs mulieri conciliandus, ut pro diverso partus stadio magis magisque dorso suo posteriora versus reclinetur, idque vèro, si lectos adhibemus, pulvinaribus, si sedili incumbit, variis adminiculis pro diversa fellarum fabrica praestari potest, & huic scopo praecipue inservit sella Steiniana, cujus fulcimentum dorsuale ope uncorum commode ad quatuor gradus reclinari valet (e).

Quantum vero Ars inde profecerit, non opus erit pluribus demonstrare; etenim tali modo lectuli & sedilia Veterum hodie correctæ sunt, ut commode in iis decumbant parturientes, optime manus ac pedes firmentur, atque sic cum minimo virium dispendio dolores adjuventur: praeterea ex quo mobile factum fuerit in fellis fulcimentum dorsuale, vario modo mutari potest parientis situs pro diversa partus periodo, quo facilius per axin pelvis progrediatur foetus, quae omnia cum Veteres latebant, haud ulteriori probatione hodiernae Artis prae veteri excellentiam & hac in parte indigere, merito confidimus.

Sequitur nunc alterum examinandum adminiculum

II. EMOLLITIO AC DILATATIO ORIFICII UTERINI, quae Veteribus non tantum in partu difficili & praeternaturali, sed & in naturali maxime celebrabatur, inprimis autem emollitio orificii, quae tantae iis curae fuit, ut ad praecavendum partum difficilem in ipsa etiam graviditate balnea, vapores, linimenta, &c. adhiberent:

ita

(e) Vid. STEIN *Anleitung &c.* T. I. Abschn. 4. Cap. 8. p. 175.

ita MOSCHIO, octavo graviditatis mense transacto, uti suadet *lavacris* & *peffariis*, quae ex *adipibus anserinis*, & *medulla cervina* constant, additque: *Digito etiam peruncto orificio matricis admoveatur, ut possit leniter & sine quassatione aperiri (f)*: in ipso vero partu inter ea, quae tunc praeparanda recenset, multa etiam ad emolliendum orificium uteri idonea commendat (g), ibidemque *lavacrum* olim laudatum rejicit, quia *vires minuit, & digestionem corporis mulieris infrigidat*; ut autem orificium ipsum dilataretur, jubet obstertricem *digito sinistro oleo calido peruncto, orificium matricis circumagendo aperire, ut chorium illuc cadere possit (g*)*. Balnea etiam ex ASPASIA suadet AËTIUS ad graviditatis terminum frequenter adhibenda, in ipso tamen partu nulla fere huc spectantia tradit, siquidem haec omnibus non tantum obstertricibus, sed & reliquis mulieribus nota esse perhibet, quapropter inunctionum aut dilatationum in partu naturali nullam facit mentionem (h), ast in partu difficili haec omnia summopere commendat (i). AVICENNA pariter, graviditate ad finem vergente, balnea laudat & inunctiones genitalium, quin & mucilagines ex semine Cydonior. & Lini bibendas suadet, iisdemque in ipso partu strenue utitur, tum & dilatationem orificii digitorum ope faciendam in usum vocat (k).

Unde liquet, quam maxime solemnem fuisse Veteribus hancce uteri inunctionem ac dilatationem, quae aliquando in partu difficili & recte quidem in usum vocantur, quo in casu etiam ab HIPPOCRATE (k*) adhibentur; in partu autem naturali haec omnia inutilia sunt pronuncianda, imo ve-

10

(f) *L. c. part. 1. C. 8. N. 3. p. 8.* (g) *C. 9. N. 6. p. 8. & C. 10. N. 4. p. 9.*
 (g*) *C. 10. N. 6. p. 9.* (h) *L. c. Tetr. 4. Serm. 4. C. 12. p. 784. & C. 13.* (i) *L. c. C. 15.* (k) *Lib. Canon. 3. Fen. 21. Traët. 2. C. 23. p. 722.* (k*) *Vid. Libr. de superfoet. p. 260. & de morb. mulier. L. 1. p. 617.*

ro quandoque noxia, cum a frequenti partium inunctione mucus naturalis, genitalibus emolliendis destinatus, detergetur, atque irritatione ipsa maxime incommoda parientibus esse deprehenditur: multo minus adhuc probanda est dilatatio uteri immixtis digitis, ante partum aut in ipso pariendi conatu instituta; sic enim Natura in opere suo turbatur, dolores veri in spurios mutantur, atque ex vi orificio illata inflammatio uteri summe periculosa haud raro enascitur: quapropter Naturae hoc opus relinquamus, quae attenuando ac sensim sensimque detergendo orificium uterinum, dolores infert longe minores, quam si digitorum ope nascituro infanti viam pandamus, qui absque hac operatione tutissime ac felicissime in lucem edi possit.

Rejeto itaque hoc Veterum adminiculo, ad aliud nos convertamus, quod ab illis vix memoratum, imo plane omissum fuit; nihilominus maximam mereatur attentionem, scil.

III. PARTIUM ADJACENTIUM, INPRIMISQUE PERINAEI CURAM. Accidit saepissime, ut, nisi caveat obstetricans, dum caput infantis ex vaginae ostio propellitur, perinaeum non tantum distendatur, sed & disrumpatur, atque ita malum inferatur, parturienti perquam molestum atque periculofum; diris enim cruciatibus hinc afficitur mulier, atque prae continuo affluxu humorum acrium, metus est, ne gangraena hasce partes occupet maxime reformidanda, qualem observationem, sanata tamen foemina, habet Celeb. VAN DOEVEREN (1); deinde redintegratio saepe non nisi difficulter instituitur, & etiam si perficiatur, plerumque in subsequente partu, ob cicatricem debiliorem, vaginaeque orificium angustius redditum, altera vice findi solet, unde nova ejus cura est suscipienda. Insignem vero molestiam & vitae taedium asserit hoc vitium, si adanum

us.

(1) L. c. C. 9. p. 145. & seqq.

usque protendatur disruptio, atque una eademque nascatur ex vagina anoque cavitas, unde secum incontinentia, earumque per vaginam excretio, spurcum sane malum, cujus cura semper caediosa est, nonnunquam imperfecta & plane inutilis suscipitur; summi itaque momenti est hujus partis dilacerationem prohibere, ne mala modo recensita enascantur.

Recentiores ergo obstetricantes sedulam hujus rei curam habentes, adminicula proposuerunt, quorum ope praecaveri & averti posset hocce malum, sed in varias abierunt partes, diversasque hunc in finem laudarunt methodos. Multi enim, inter quos J. MESNARD (*l*^{*}), FRIED (*m*), ROEDERER (*n*) aliique, utriusque manus indicem & medium digitum ad latera orificii vaginalis applicant, hisque sub quovis ingruente dolore perinaeum versus os Sacrum premunt, atque infra caput ducunt; hac autem ratione capiti viam pandi, & perinaei fissuram praecaveri, opinantur: verum maxime damnandum videtur hoc consilium, tantum enim abest, ut hac ratione perinaeum a dilaceratione immune servetur, ut longe facilius ejus ruptura contingere possit, quum aliter fieri nequeat, quin perinaeum ab immixtis digitis ad os Sacrum repressum valide tendatur atque distrahatur, unde, accedentibus doloribus, qui caput foetus simul impellunt, necessario ejus fissura summopere est metuenda.

Aliam vero viam ingressi sunt alii, eamque longe meliorem ac securiorem, laudant scilicet, ut, quam primum perinaeum a capite foetus protendi coeperit, illud ab obstetricantis manu, vel nuda, vel linteo munita, sustineatur & sursum prematur, ita ut infantis exitum quasi prohibere velit; qua encheiresi perinaei nimia distensio, ac cita nimis partium dilatatio, a propulso foetu produ-

cen-

(*l*^{*}) Vid. *le guide des accoucheurs*, Paris 1753. p. 194. §. 190. N. 3.

(*n*) *L. c. C. 12. §. 311. β* & γ.

(*m*) *L. c. Buch 3. Kap. 5.*

cenda, optime praecaventur; caput enim nunc tutissime juxta perinaeum gliscit, atque ita occipite sub arcu pubis dirigitur, ut ulterior ejus e sinu vulvae evolutio facile & absque noxa genitalium fieri possit. Summo itaque jure hanc methodum praestantissimi in Arte Viri commendarunt, inter quos nominasse sufficiat PUZOS (*o*), BURTON (*p*), SMELLIE (*q*), J. HARVIE (*r*), PLENCK (*s*), JOHNSON (*t*), WHITE (*u*), J. P. ROBERT, qui hanc methodum in domo obstetricia Havniensi summo cum successu institui scribit (*v*), VAN DE LAAR (*w*), J. M. AEPPLI (*w**), BAUDELOCQUE (*x*), & STEIN (*y*), qui tamen & aliam encheiresin habet, ut evolutio capitis promoveatur; nimirum duos digitos incurvatos inter perinaeum & caput foetus introducit, ut super hosce descendat, ac simul perinaeum leniter retrorsum ducatur (*z*); quodsi vero spatium non detur, per quod immittantur digiti, ROONHUYSI vectem adhibet, quem in omni partu naturali hoc scopo ab Obstetricantibus in usum esse vocandum suadet (*a*); si autem vectis ad manus non sit, unum vel duos digitos ano intrudendos, atque hac ratione caput sursum, antrorsumque esse premendum praecipit (*b*). Sed digitorum aut vectis introductio, ac per eam praestanda encheiresis, minime tuta videtur, nec minus perinaei fissurae ansam praebere poterit, quam memorata FRIEDII aliorumque methodus, quam ipse STEINIUS alibi maxime reprobatur (*c*); tensum quippe a foetus capite perinaeum non potest non ab introductis digitis aut vecte

(*a*) *L. c.* p. 115. (*p*) Vid. *Sistem of Midwif.* §. 48. p. 118. (*q*) In *Explic. Tab. 15.* (*r*) Vid. *practic. directions, shewing a method of preserving the perinaeum in birth &c.* Lond. 1767. in *Celeb. SANDFORD Natur- en Geneeskundige Biblioth.* T. 7. p. 327. (*s*) *L. c.* p. 59. (*t*) *L. c.* p. 197. & seq. (*u*) *L. c.* p. 104. (*v*) Vid. *Societ. Medic. Havniens. Collectan.* T. 1. p. 363. (*w*) *L. c.* §. 170. (*w**) Vid. *Die sichere Zurfälligung der Nachgeburt in bestimmten Fällen*, Zürich 1776. in praefat. p. 8. (*x*) *L. c.* T. 1. §. 781. (*y*) *L. c.* Abschn. 4. Cap. 9. §. 599 & 600. (*z*) §. 601 & 602. (*a*) §. 604 & 605. (*b*) §. 606. (*c*) §. 590. & seq.

recte magis distrahi atque attenuari, unde facilius ejus disruptio; & hac de causa etiam rejicimus laminam flexilem, quam loco vestis usurpat GEHLER (d). Maxime autem reprobanda digitorum in anum immissio, quam praeter STEINIUM etiam commendat GEHLER; hac enim intestinum rectum ita irritatur, ut exinde haud raro inflammetur, quin imo hoc artificium frequentissimam ominosae illius diarrhoeae puerperarum causam esse, multa observatione compertum se profitetur Celeb. VAN DOEVEREN: unde liquet, magis etiam noxiam esse illam encheiresin, quam ad perinaei dilacerationem arcendam proposuit SEBIZIUS (e), ut scilicet *pila oblonga ex linteis complicatis parata ano fortiter inprimatur*; haec autem, praeterquam quod infantis exitum impediat, majora etiam quam sola digitorum intrusio parturienti mala creare valet.

Suadenda idcirco perinaei sustentatio, tanquam optimum ad prohibendam ejus dilacerationem auxilium, quo etiam in Gynaecio Argentinenſi summo cum fructu utuntur, adeo ut numquam perinaeum disruptum ibi viderim; quum, lenta partium dilatazione sic facta, ac foetus occipite sub pube directo, sensim evolvatur totum caput, quin tamen matris genitalia aliquid damni inde patiantur, quo egregio artificio plurima avertuntur mala, quae apud Veteres hancce cautelam negligentes, frequentissima esse debuerunt, adeoque exinde etiam multum increvisse Artis nostrae praestantiam, jure meritoque concludere liceat.

Capite infantis feliciter sic nato, videamus, quam encheiresi ulterius ad finem perducatur partus, & quam ratione optime adjuvari queat, atque ita aliud in partu adminiculum nobis memorandum venit, scilicet

IV. COR-

(d) Vid. *Diff. de part. natur. adminicul.* Lips. 1772. gent. 1672. p. 614.

(e) Vid. *Exercit. Medic. Ar-*

IV. CORPUSCULI INFANTIS EXTRACTIO. Veteribus haecce enchei-
resis ita peragebatur, ut prodiens caput, mox utraque manu ad ejus late-
ra posita, amplecterentur, atque ita vel recta attrahendo, vel ad latera motitando
aut rotando, ulterior infantiseductio perficeretur. Inter illos inprimis hanc
methodum descripsit MOSCHIO sequenti modo: *Apprehendere (caput) de-
bet obstetrix, & in diversum adducere huc atque illuc. Illo tempore, quando
se matrix aperit, conari oportet, & quando se concludit, non conetur, ne fer-
vore aut sanguinis fluxu, ipsius matricis adductio emergat. A lateribus vera
ministræ sine quassatione, manibus apertis, deorsum deducant (f):* atque tali
ratione non tantum Veteres, sed & plerique Recentiorum procedunt, firmiter
sibi persuadentes, eximiam opem parturienti ita ferri, infantisque exitum opti-
ma methodo promoveri; in errorem inducti ex eo, quod putaverint, truncum
foetus directionem capitis non observare, atque ita humeros juxta transversam
aperturæ pelvis inferioris diametrum exire, crediderint.

Ex quo autem novissimi quidam Auctores notaverint, humerorum conversio-
nem fieri ad pelvis oram inferiorem, qua, nato capite, secundum majorem ejus
diametrum progrediuntur, ut consimiles sese tangant dimensiones, insignis ex-
inde in Artem redundavit utilitas, atque praeceptum illud summi certe mo-
menti manavit, natum caput non esse attrahendum, sed leviter modo continen-
dum eousque, donec humerorum inversio contingat, qua facta, tuto reliqui
corporis solutio fieri possit: urgent inprimis hoc praeceptum WHITE (g),
BAUDELOCQUE (h), F. H. LOSCHGE (i), tum & Auctores, quos laudavi-
mus,

(f) L. c. C. 10. N. 6. p. 9. (g) L. c. p. 90. & seqq. nec non p. 105 & 106.
(h) L. c. T. 1, §. 785. (i) In Diff. de Medicina Obstetric. agente & expectante, Erlang.
1780. p. 16.

mus, ubi de transitu foetus per pelvim agebamus, atque haec eadem cautela in Nosocomio Argentinensi semper optimo cum successu observatur. Aliam insuper encheiresin addit DE LEURVE, quae minime contemnenda videtur, facta feil. humerorum inversione, non recta educendum esse infantem censet, sed tali ratione, ut capite sinistra manu ad inguen matris appresso ac firmato, dextra manu reliquum corpusculum protrahatur, atque ita fetus circa proprium funem umbilicalem tanquam axin circumvolvatur, unde pericula ex fune nimis brevi forte oriunda avertuntur, & funiculus circa collum contortus optime solvi potest; quae omnia ex ipsius Auctoris verbis melius intelliguntur: *La tête & les épaules sorties, on porte de la main gauche la tête de l'enfant sur la cuisse de sa mère, & avec la droite on fait l'extraction du corps; de sorte que l'enfant sorti, sa tête se trouve près le pénil de sa mère, & ses pieds le long de sa cuisse; ce moyen donne la facilité de détortiller le cordon, &c. (k),* & hac cautione adhibita, nullum umquam obstaculum a circumvolutione funis vidit JOHNSON (l).

Maximi vero habendam esse WHITII aliorumque methodum, atque contrariam agendi rationem multa inferre mala, facile apparet, si perpendamus, quod si natum caput mox attrahamus, humeros facile sic retineri & nonnumquam incuneari, aut si, reluctante obstetrice, Natura tamen hanc inversionem efficiat, a vi vaginae & utero illata, dolores parturientibus cieri, atque alia symptomata, puerperium funestum reddentia, excitari, quae omnia, hoc opere Naturae relicto, commodè praecaveri potuissent. Accedit & hoc, quod, nato capite, si parumper expectemus, puerpera a doloribus conquassantibus multum defatigata, per aliquod saltem tempus quiescere ac vires recuperare valeat, quod extractio ilico instituta haud permittit. Tandem summopere etiam hac de causa rejicienda est

con-

(k) L. c. part. 2. Livr. 1. Sect. 2. §. 629.

(l) L. c. p. 198. in fine.

contraria methodus, quia tali ratione dolores sic dictos propellentes non experiuntur puerperae, adeoque contractio uteri non fit lenta, nec regularis, sed inordinata, spasmodica, unde secundinae non ita facile sequuntur, & sinuum venosorum uteri ostia clauduntur, priusquam illa gradatim contrahi, ac contentum sanguinem evacuare possint, cujus nunc tenuior tantum pars exit, crassior vero remanet, qua deinde irritatur uterus, eamque ejicere conatur, atque sic producantur illi dolores, quos vocamus *dolores post partum*; praematuram itaque hanc infantis educationem primariam esse causam difficilis secundinarum exclusionis, ac dolorum post partum, haud immerito censet WHITE (m).

Postquam nunc infans in lucem prodiit, nondum ab omnibus liberata est mater, neque ex toto suum peregit officium obstetricans, siquidem infans adhuc cum placenta cohaeret, qui nexus post partum solvi debet, tum & ipsa placenta, uteri contractiones impediens, debito modo est removenda, quae ab omni aevo summe momentosa habita fuerunt, inprimisque, de qua nunc agendum erit, V. SECUNDINARUM EXTRACTIO, cujus cura non rite suscepta, haud raro matrem; tot tantisque periculis defunctam, nova opprimit difficultate, minime temnenda: quapropter hanc materiem paulo latius pertractabimus, atque exinde Artis hodiernae excellentiam probare annitemur.

Prolixe admodum de hoc adminiculo egerunt Veteres, & varias encheirifes hunc in finem commendarunt, quos inter praecipue nominandus HIPPOCRATES, qui solo infantis pondere placentam educere tentat, qua de causa puerperam super *lasano* collocat, aut *in sella recubitoria perforata*; si vero prae imbecillitate in hisce sedere nequeat, *lectum a capite quam erectissimum exstruit, ut deorsum declinet, sicque foetus suo pondere quam*
maxi-

(m) L. c. p. 91 & 92. tum & p. 105 & 106.

*maxime deorsum simul trahat: fune autem abrupto aut ante tempus diffisso, convenientibus appensis ponderibus, secundarum eductionem molitur, sed simul inculcat, id sensim, non vi faciendum, ne praeter naturam distractae secundae inflammationem excitent; quapropter, ne nimis cito foetus suo pondere placentam abriperet, peculiarem quandam encheiresin instituendam suadet, quam ita descripsit: Supponendae igitur foetui lanæ quam maxime sublatae recens carptæ, quo paulatim cedant, aut utriculi duo copulati aqua pleni, supra quos lanæ imponendae, & supra lanas foetus collocandus, deinde uterque utriculus stilo pungendus, quo sensim aqua defluat, qua effluente, utres demittantur ac confidant, his autem demissis foetus umbilicum attrahit, umbilicus vero secundas extrahit (n); hanc autem optimam curationem vocat, minimeque noxiam, de quo tamen dubitamus. At tali modo si non sequeretur placenta, atque eandem artissime complecteretur uterus, sternutatorio medicamento illam ejicere tentat (o); quodsi neque tali concussione excuteretur, ingentem medicamentorum farraginem commendat, maximeque stimulantia, emmenagoga, quin & ad ipsas cantharides devenit, tum in forma *peffi subditi*, quod utero immittebat, tum & aliis calidis commixtas easdem intus exhibebat (p), qualia eundem in finem etiam commendat GALENUS (q); nec raro tamen, strenue his omnibus admotis, ad ultimum pervenire coactus fuit HIPPOCRATES, ut nimirum placenta in utero relinqueret, donec putredine colliquata vel sponte exiret, vel uteri vi foras eliminaretur: Plerumque vero putrescunt (secundae), sexto tamen aut septimo die, aut etiam posterius exeunt (r). Exinde*

pate-

(n) Vid. *Libr. de superfoet.* p. 261. (o) In *Libr. 5. Aph.* 40. (p) Vid. *Lib. 1. de morb. mulier.* p. 608. l. 25 & 42. *ibid.* p. 624. l. 44. p. 625. l. 25 & 40. & p. 632. in initio. (q) Vid. *Lib. 8. de simplic. facult.* *Lib. 2. de Antidot.* C. 8. 9 & 10. *de composit. pharmac.* *Lib. 7. C. 5.* in Edit. apud JUNTAS T. 4. p. 61, 115, 116 & 185. (r) In *Libr. 1. de morb. mulier.* p. 608. l. 40. & p. 609. l. 15.

patefeit, omnem operam navasse HIPPOCRATEM, ut mox a foetu emisso; secundinae expellerentur, imo vero non prius foetum ab iis liberasse, quam ipsae remotae essent, ex dictis liquet; quod vel inde magis confirmatur, siquidem inter causas difficilis secundinarum exclusionis referat: *Si vi abruptus umbilicus fuerit, aut si per imprudentiam ejus quae umbilicum secat, priusquam foetus involucri ex uteris prodierit, secus fuerit (s)*: quam tamen funis dissectionem placentae expulsionem praemisisse videtur ARISTOTELES, ubi dicit: *Sed si secundae non statim cum foetu exierint, dum intus ipsae, foris autem infans est, deligato umbilico secantur (t)*.

Pulcherrima sunt, quae hac de re apud MOSCHIONEM leguntur; etsi enim *lenissime & obstetricaliter* una cum secundinis infantem protrahere tentet (u), *separandum* tamen esse infantem dicit, *si tarditas ipsa moram habuerit*; deinde egregiam exhibet methodum ad placentam extrahendam, quae omnino laudabilis dici meretur (v); summo jure etiam reprobatur *sternutamenta*, & *a scala suspensiones*, & *potiones calidas*, & *pondera*, siquidem *fervorem partibus ipsis facere possunt & praesentem sine dilatione sanguinis fluxum (w)*: unde doctrinae ejus praestantia prae Hippocratica elucescit; & quamvis statim etiam a nato infante placentam removeat, id tamen debitis sub cautelis & quavis meliore encheiresi efficere studet, quae & nostris diebus laudari posset. CELSUS de foetus mortui extractione agens, optimam tradit methodum, qua secundinae, ubi remanserint, educi debeant, ita enim ille: *Medicus deinde sinistra manu leniter trahere umbilicum debet ita, ne*
abrum-

(s) L. c. p. 608. in fine. (t) Vid. H. A. L. 7. C. 10. (u) L. c. C. 10. N. 6. p. 9. (v) L. c. C. 14. N. 7. p. 13. quem totum textum ob ejus praestantiam suis Commentariis inferuit VAN SWIETEN, Vid. T. 4. p. 574. (w) Ibid. 13 & 14.

abrumpat, dextraque eum sequi ad eas, quas secundas vocant, — hisque ultimis apprehensis, venulas membranulasque omnes eadem ratione manu diducere a vulva, totamque illud extrahere (x). P. AEGINETA & AËTIUS similem fere operationem, a CELSO commendatam, sequuntur, si placenta jam ab utero sit soluta, cui vero si adhuc connexa est, recte subjungunt, ejus educationem tentandam esse *non in directum, ob uteri prolapsus timorem, neque cum violentia vehementi, sed leniter primum ad latera hac illac transferatur, dein aliquanto magis intente, sic enim obedit, & accretio exolvitur*; & hactenus quidem bene, sed occluso uteri osculo, a quo summopere metuebant, praeunte HIPPOCRATE, linimenta, sternutatoria, potiones calidas, & quaecunque emmenagoga in usum trahunt, ut *hiet osculum*; si vero neque sic educatur placenta, *non oportet perturbari, nam post paucos dies putrefacta & in saniem dissoluta excidit* (y): atque ita, methodo extrahendi excepta, eodem modo procedunt, quo HIPPOCRATEM supra vidimus.

Hisce ex toto assentiuntur Arabes, inter quos AVICENNA, ea tamen differentia, ut in initio jam exhibeat sternutamenta, antequam ad ipsam operationem procedat, *ut tensus veluti chorda venter fiat, & tendatur & lubricetur secundina*; partem autem prodeuntem, ne ascendat, *stringit ad coxas mulieris ambas ligatione desuper*; deinde tractionem illam secundum rectitudinem summopere etiam culpatur: verum his omnibus irritis, expectat, donec in putrilaginem versae sponte Naturae ejiciantur secundinae, & hanc putrefactionem medicamentis, imprimis unguento basilico promo-

ven-

(x) Vid. l. c. L. 7. C. 29. p. 492. l. 25. (y) Vid. P. AEGINET. l. c. L. 6. C. 75. p. 583. & AËTIUS ex PHILUMENO l. c. Tetrab. 4. Serm. 4. C. 24. p. 791.

vendam suadet (z): caeterum cum AËTIO & AEGINETA plurima laudat medicamina, ut symptomata ex hac colliquatione oriunda praecaveat. Eodem fere modo procedit ALBUCASIS, qui, ore matricis coarctato, suffimigia adhibet, quem in finem peculiare instrumentum delineat, de quibus etiam memorat AVICENNA; caeterum paribus verbis ac AVICENNA utitur, ligationem partis elapsae ad coxam mulieris, & *clysterisationem unguento tetrapharmacôn* etiam commendat (a).

Ex hisce nunc constat, Veteres omnes in eo convenisse, ut, foetu emissô, statim placentae expulsionem accelerarent, nihil in hoc opere Naturae relinquentes; de modo autem, quô id efficere studerent, plurimum discrepasse, vel ex eo patet, quod alii soli encheiresi debite institutae acquiescerent, nihil ultra tentantes, alii vero non una hac confiderent, sed mox sternutatoria, stimulantia, & quaevis pellentia in usum vocarent, quibus remorantem placenta ejicere conarentur; his autem omnibus incassum adhibitis, expectabant putredine factam aliquo post tempore dissolutionem, donec id sua sponte fieret, quod Arte efficere non potuissent.

Videamus jam, quid Recentiores hac de re docuerint, & in quantum Veterum praecepta vel secuti fuerint, vel ab iis desciverint: inter hos inprimis duplex, eaque e diametro sibi opposita, viget opinio, quam nunc examinabimus, visuri, neutram indiscriminatim esse accipiendam.

Plurimi insignia mala a relicta placenta metuentes, praesertim colliquationem ejus & corruptionem, quae facile tali corpori spongioso in utero humido & calido contingere posset, quin & plenariam ejus retentionem verentes, cum

ute-

(z) In *Libr. Canon.* 3. *Fen.* 21. *Traç.* 2. *C.* 16. *p.* 719. (a) *L. c.* *C.* 78. in *SPACENII Collect.* *p.* 447.

uteri osculum foetu expulso statim sese occluderet, ac constringeret, nihil prius esse agendum operatori post foetus exclusionem, quam ut citissime placenta extrahatur, firmiter sibi persuadent; & hujus sententiae multi dantur fautores, quos inter nominandi P. FRANCO (b), E. RHODION (c), J. RUFFIUS, qui diserte monet: *Si (secundae) moram aliquantulum quacunque de causa fecerint, omnem obstetrix impendat operam, ut has ad exitum sollicitet (d)*; porro A. PARÆUS (e), FABRIC. DE AQUAPENDENTE (f), MAURICÉAU (g), MOWBRAY (h), MESNARD (i), & hi tres ultimi funem non prius rescindunt, quam placenta educta fuerit: inter affectas hujus doctrinae etiam memorari debent VAN DEVENTER (k), PEU (l), LEPORTI-NUS (m), & imprimis inclaruit haecce doctrina, postquam J. V. HART-TRAMFFET aperte declarasset: *Non differendam esse quam fortiter etiam adhaerere, secundinarum extractionem, nihilque in ambigua isthac re vel expectationi medicae, vel spontaneo naturae operi, vel casui fortuito esse tribuendum (n)*. A quo tempore huic doctrinae accesserunt STUART (o), CHAPMAN (p), PUGH (q), BOESEL (r), ASTRUC (s), ZÜCKERT (s*), FRIED (t), GÜNZ (u), & DIDELOT (v): quibus etiam

(b) Vid. *Traité des hernies*, Lyon 1561. C. 85. p. 358. & seqq. (c) *L. c. C. 6. p. 22.*
 (d) *de morb. mulier. L. 3. C. 4. in SPACHII Collect. p. 176.* (e) *de homin. generat.*
C. 18. in SPACH. Coll. p. 413. (f) *In Oper. Chirurg. Amstel. 1723. p. 581.* (g) *L. c.*
L. 2 C. 8. p. 248. (h) Vid. *the female. Physician. C. 18. p. 220.* (i) *L. c. p. 200.*
 & seqq. (k) *L. c. C. 28. p. 190 & 352.* (l) Vid. *pratique des accouchem. L. 2.*
C. 15. (m) *In Kurtze doch gründliche Eörterung einiger die Zurück gebliebene Nach-ge-*
burth betreffender Fragen, Leipz. 1728. p. 133. (n) *In Diss. de non differenda secundina-*
rum adhaerentium extractione §. 2. Lips. 1735. in HALLERI Collect. Diss. Chir. T. 3. p. 400.
 (o) *Diss. de secundin. nociv. & salutarib. Argent. 1736.* (p) *A treatise on the improvement*
of Midwif. &c. Lond. 1753. C. 3. p. 165. (q) *In treatise of Midwif. p. 27.* (r) *In*
Grundlegung zur Hebammenkunst, Altona 1753. p. 58. (s) *l'Art d'accoucher &c. p. 77 &*
211. (s*) Vid. *Diät der Schwangeren und Sechswöcherinnen, in Celeb. SANDIF. Biblioth.*
T. 8. p. 223. (t) *L. c. §. 194—203.* (u) *Institut. Art. Obstetr. §. 297.* (v) *In-*
struction pour les Sages Femmes &c. in Comm. Lips. Vol. 20. p. 629.

etiam addi posset SMELLIE; etsi enim in *Treatise &c.* moneat, in placentae extractione non festinandum esse, ubi nulla adsint contra-indicantia (*w*), attamen in opere admodum festinanter procedit, cui praejudicio se etiam favisse, ipse fatetur, donec a RUYSCHIO meliora edoctus fuerit (*x*). Verum, ne memoremus mala in foetum redundantia, si ante deligationem funis secundinae removeantur, gravissima contra hanc doctrinam militant argumenta.

1. Quamvis plurimi horum Auctorum prudenter & caute omnino procedendum esse velint atque commendent, iidem tamen nullum adesse adhaesionis gradum, qui non superari provida & in encheiresi experta manu possit, audacter affirmant, unde necessario, praesertim si eandem sibi regulam praefigunt imperitiores, vehemens uteri irritatio, inflammatio, dilaceratio, ruptura, inversio, aliaque terribilia mala oriuntur, uti tristis docet experientia; quales fatales casus plurimos collegerunt HALLER (*y*), AEPPLI (*z*), nec non Celeb. SANDIFORT, qui & ipse funestam exinde uteri inflammationem observavit (*a*): imo vero, quod nonnunquam talis detur placentae cum utero coalitus, ut absque puerperae summo discrimine extrahi nequeat tota placenta, vel unica docet SMELLII observatio, ubi tantam vim adhibere debuerit in scirrhis secundinarum particulis solvendis, ut mors puerperae proxime insecuta fuerit; deinde vero cautior factus in simili casu has portiones in utero reliquit, & a Natura absque ullo superveniente sanitatis discrimine expulsa vidit (*b*).

2. Si absque limitatione & indiscriminatim haec regula accipiatur, non raro me-

(*w*) Vid. *Book 3. Ch. 2. Sect. 5. T. 1. p. 240.* (*x*) In *Collect. 23. Case 1—10. T. 2. p. 390.* (*y*) In *Elem. Phys. T. 8. part. 1. p. 448 & 449.* (*z*) *L. c. p. 33—49.* (*a*) In *Obff. L. 2. C. 5. p. 111.* quem casum etiam descripsit in *Bibliothec. T. 7. p. 332.* in notis. (*b*) *L. c. Case 1 & 2.*

metuenda est uteri atonia, unde periculosissima haemorrhagia vix ac ne vix quidem compescenda; etenim in graviditate summe distentae fuerunt uterinae fibrae, hinc si nimis cito depleatur uterus, necessario in talem atoniam incidere debet, unde simul liquet, non omni suo munere defunctam esse placentem post foetum emissum, hac autem tunc temporis utitur Natura quasi pulvinari quodam, cujus ope vasa distenta leniter premuntur, ut facilius & aequabiliter sensim sese contrahere possent; quapropter extracta justo citius placenta, & ante debitum tempus remoto hocce sustentaculo, vasa sanguine turgida, in utero hiantia, necdum ad pristinam diametrum redacta, de pleno rivo cruorem fundunt, atque letali haemorrhagia matrem opprimunt, quae non contigisset, si in matrice relicta fuisset placenta, usque dum amissam vim contractilem hoc organon recuperasset. Consuli hac de re inprimis merentur LEVRET (c), BAUDELOQUE (d), LE ROUX (e), HUGUENIN (f), & VAN DER HAAR (g). Haec vero pericula ut alii evitarent, experientia etiam ex hominibus & brutis desumpta freti, nec non attendentes, partu excluso atque evacuato utero, post aliquod tempus de novo fieri in utero contractiones, quibus placenta excuteretur, opinati sunt, ductum Naturae esse sequendum, atque hanc expulsionem, quae a vi uteri sese contrahentis praestari debet, esse expectandam, nec aliquo modo conamina, quibus Natura hoc corpus quasi altera quadam partus specie ejicere solet, esse turbanda, imo vero remanentibus secundinis tantam esse concedendam moram, donec in putridum liquamen redactae sponte secederent.

(c) Vid. *Suite des observations*, Art. 9. p. 447. (d) *L. c. T. I. §. 882.* (e) Vid. *Observations sur les pertes de sang des femmes en couches*, Dyon 1776. p. 49. & 241 — 246. (f) Vid. *Diss. de atonia uteri*, Argent. 1770. (g) In *Verhandelingen van het Batavisch Genootschap te Rotterdam &c. T. 6. p. 85.*

rent. Nemo hanc doctrinam fortius propugnavit, quam RUYSCHIIUS (*h*); & hanc deinde plurimi adoptarunt, inter quos prae caeteris memorari debent OULD (*i*), GEHLER (*i**), VOGEL (*k*), & HARVIE (*l*): dantur autem inter hosce nonnulli, qui ad Veterum auctoritatem provocant, atque eos etiam pro expectantium, donec sponte exirent secundinae, sententia fuisse, asserit HARTTRAMFFT, nec *aliam apud HIPPOCRATEM adhaerentis placentaе curationem, quam, quae putrefactione fit, inveniri*, dilerte pronunciat (*m*); verum satis, ni fallor, in superioribus demonstratum fuit, HIPPOCRATEM & cum eo reliquos Graecos, excepto MOSCHIONE, tantummodo in hoc casu tale consilium dedisse, ubi post quaevis remedia incassum tentata, placenta tamen evelli non posset, quam caeterum mox post partum remove conabantur; neutiquam idcirco huic sententiae addictos fuisse Véteres, sed ad priorem classē esse referendos, merito concludimus. Verum ut ad quaestionem nostram redeamus, quamquam ut plurimum Natura ipsa huic negotio sufficit, ita ut exiguo post partum temporis spatio placenta sponte secedat, obstant tamen multa, quo minus hanc opinionem amplectamur, quorum praecipuā tantum allegabimus.

I. Licet constet, aliquando absque noxa per. sat longum tempus retentas fuisse in utero secundinas, quin imo easdem in putrilaginem conversas haud gravia concitasse symptomata (*n*), res tamen & ratio docent, facillime putre-

(*h*) Vid. *Alvers. Anat. Decad.* 2. p. 30. & seqq. hanc autem suam opinionem deinde mihi explicuit in *Tract. de musculo fundo uteri reperto*, Amst. 1726. p. 9. (*i*) *L. c.* p. 58. (*i**) In duabus *Diff. de utero secundinas expellente*, Lips. 1765 § 67. in *Comm. Lips. Vol.* 16. p. 285. (*k*) In *Diff. de non acceleranda secundinar. extractione*, Gotting. 1768. in *Celeb. SANDIFORT Biblioth. T.* 8. p. 206. (*l*) *L. c. part.* 2. in *SANDIF. Biblioth. T.* 7. p. 331. (*m*) *L. c.* §. 16 § 12. (*n*) Vid. HALLER. *l. c.* p. 447. & AERLI *l. c.* p. 92. & seqq.

redinem contrahere placentam in utero, atque tali in statu minime temnenda mala producere posse, ita ut ipso contactu uterus in similem putredinem rapiatur, aut in reliquum corpus lege vasorum absorbentium pessimi inde redundent affectus, qui eo periculosiores sunt habendi, quo major tunc temporis obtineat ad putredinem dispositio (*o*). De hisce imprimis conferri merentur praeter Veteres *ll. cc.* LEPORINUS (*o**), HALLER (*p*), HARTTRAMFFT (*p**), PUZOS (*q*), PUGH (*r*), WHITE (*s*), GERSON (*t*), & BAUDELOCQUE (*u*).

2. Græve etiam exinde contra hanc sententiam petitur argumentum, quod nonnunquam pro parte aut ex toto soluta placenta, eaque orificio incumbente, ex atonia uteri vel universali vel partiali, sanguinis fluxus maxime pertimescendus oriatur, qui magis etiam est reformidandus, si sanguis foras sese non prodat; haec autem haemorrhagia necessario mulierem opprimit, cum obstetricans accedat, qui, partu peracto, omnia se confecisse putat, & si fluxus sese extus haud manifestet, rem Naturae committit, nec in statum uteri inquit, ut exinde judicet, nûm protinus sit separanda placenta, nûm tutius vi expultrici uteri sit relinquenda: ejusmodi vero haemorrhagiam re vera aliquando locum habere, docent imprimis LEVRET (*v*), LE ROUX (*w*) & BAUDELOCQUE (*x*), nec minus hanc esse metuendam, ubi in peculiari quodam sacco retinetur placenta, observata DENYSII (*y*) & LE ROUX (*z*) confirmant.

Fa-

(*o*) Vid. Celeb. VAN DOEVEREN *prim. lin. de Morb. Mulier.* §. 90. (*o**) *L. c.* p. 69. & *seqq.* (*p*) *L. c.* p. 449. (*p**) *L. c.* §. 15. (*q*) *L. c.* p. 146. (*r*) In *Treatise of Midwif.* p. 30. (*s*) *L. c.* Case II. p. 302. (*t*) In *Collectan. Havniens.* T. 2. Art. 24. p. 204. (*u*) *L. c.* T. I. §. 906. (*v*) In *l'Art des accouchem.* §. 783. & 84. p. 144. (*w*) *L. c.* §. 120. p. 75. & §. 124. p. 77. (*x*) *L. c.* T. I. §. 874. & 875. (*y*) In *Verhand. over het ampt der Vroedm. en Vroedvr.* C. 3. p. 31. Leid. 1733. (*z*) *L. c.* p. 269.

Facile hinc intelligitur, utramque regulam absque limitatione assumtam incommodis laud superandis laborare, concludamus itaque, generale quoddam praeceptum, omni exceptione majus, nequaquam hic praefigi posse, sed sollicite distinguendos esse illos casus, in quibus placentae expulsio vel Naturae relinqui, vel ejus extractio accelerari debeat; hanc vero methodum prae reliquis commendarunt PLATNER (a), PUZOS (b), LEVRET (c), ROEDERER (d), VAN SWIETEN (e), STEIN (f), PLENCK (g), WHITE (h), DE LEURYE (i), ROBERT (k), BAUDELOCQUE (l) & VAN DE LAAR (m), quibus etiam consentientem audivimus Celeb. Praeceptorum VAN DOEVEREN in eximiis Praelectionibus de Morbis Mulierum. Horum autem Virorum doctrina ad seqq. redit: nimirum nulla urgentia symptomata si adsint, quo minus haecce eductio acceleretur, spontaneam placentae solutionem absque ullo metu esse expectandam censent, tum demum vero manum utero immittendam, & secundinas eximendas esse, quando novi oriuntur dolores, modica haemorrhagia adest, & contractus globi sub forma in regione pubis sentitur uterus: optime hoc notarunt PUZOS (n), LEVRET (o) & DE LEURYE (p); tali etiam modo in Xenodochio Argentinenſi procedunt, in quo vidimus, hanc methodum eventum fortunatum semper fortitam fuisse, neque ullis periculosis stipatam symptomatibus. Si vero memorata signa deficiant, aut ex horum per sat longum tempus absentia atoniae uteri suspicio nascatur, inprimis flac-

cido

(a) In *Institut. Chir.* §. 1419—1421. (b) *L. c.* p. 141. (c) Vid. *l'Art des accouchem.* Part. 3. Chap. 2. Art. 4. p. 143. *Essai sur l'abus des regles general.* &c. p. 168. & seqq. nec non *Memoir. de Chir.* T. 3. Art. 10. p. 216. (d) In *Elem. A O C.* 14. §. 343. & seqq. (e) In *Comm.* T. 4. p. 578. (f) *L. c.* T. 1. §. 624. & seqq. (g) *L. c.* p. 59. (h) *L. c.* C. 5. p. 82. conf. p. 308. (i) *L. c.* Part. 2. Livre 1. Sect. 9 §. 849. & 860. (k) In *Collect. Havniens.* T. 1. p. 364. (l) *L. c.* T. 1. §. 852. (m) *L. c.* C. 10. §. 195. p. 90. (n) *L. c.* (o) Vid. *Memoir. de Chir.* T. 3. p. 221. (p) *L. c.* §. 850.

cido & distento remanente hocce organo, placenta solutio non est tentanda, nisi certi simus, uteri vim contractilem, quae frictione manus in hypogastrio incitari debet, ex toto esse restitutam (*q*). Si autem in tali casu, aut alia quacunque de causa, portione placenta ab utero soluta, sanguinis profusio vel & aliae rationes nos cogant, ut citissime placentam removeamus, facilis & lenis adhibenda est operatio; scil. missa imprudenti funiculi tractione, ad CELSI methodum manum in uterum immittimus, digitisque inter hunc & secundinas positis, leni motitatione eas separamus & quasi deglubimus (*r*); nec aliter ut plurimum procedendum, ubi in peculiari sacco retinetur placenta, siquidem tunc rarissime a sola Natura expelli potest (*s*). Hac deglubitione peracta, notandum adhuc venit, ut secundum pelvis axin educatur placenta; etenim, foetu expulso, pristinum locum occupat uterus, atque angulus ejus cum vagina restituitur, quapropter, ne inde difficultates in eximendis secundinis enascantur, ad hunc angulum omnino attendi debet, quem in finem recte suadent STEIN (*t*) & BAUDELOCQUE (*u*) funiculum una manu prehendere, alterius manus duos digitos quam altissime vaginae immittere, hisque funem reprimere versus os Sacrum, ut hac ratione juxta pelvis axineductio peragatur. Et si nonnunquam statim ad placenta separationem procedere debemus, fieri tamen potest, ut non nisi per frustra educi queat, cum reliquae particulae nimis arcte adhuc utero sunt connexae, quas si violenter evellere tentaremus, certo certius uterus laederetur, hinc in tali casu, remota portione soluta,

reli-

(*q*) Conf. Inprimis LE ROUX *l. c.* §. 87. p. 53. & §. 173. p. 115. (*r*) Egregie jam hanc encheiresin descripsit FABRIC. AB AQUAPENDENTE in *Opp. Chir. Part. 2. C.* 87. p. 581. *L. B.* 1723. Conf. etiam LEVRET *suite des Observat. p.* 139. & BAUDELOCQUE *l. c. T. I.* §. 880. & §. 898. (*s*) Vid. Celeb. VAN DOEVEREN *l. c. C. II.* p. 174. & LE ROUX *l. c.* §. 205. p. 137. (*t*) *L. c. T. I.* §. 640. & 646, (*u*) *L. c. T. I.* §. 869. & seqq.

reliqua cohaerens est finenda, usque dum de novo sese contrahat uterus, & ab accreta sese liberet placenta; atque hanc methodum feliciter instituit LE ROUX (x), qui recte etiam commendat, partem placentae cum utero concretam, ut in casu SMELLII obtinuit, esse relinquendam, cum haec citius vel tardius sponte prodire soleat (y), & mala longe majora a vi utero illata, quam a secundinarum portione per aliquot dies remanente, parturienti immineant.

Cuilibet attendenti facile apparebit, quanto melius consulatur puerperis, ex quo media hacce via incedendum esse putaverint obstetricantes; sic enim laesiones uteri ejusque atonia a praecoci nimis & violenta extractione pertimescenda evitantur, nec ab utero jam solutae secundinae tamdiu in eo morantur, ut pravas qualitates contrahant, & cum puerperis communicent: nec regerant adversarii, si aliqua conceditur mora, mox subsequi orificii uterini stricturam, atque hac de causa vel difficulter; vel plane non placentam educi posse, cum in partu tam insigniter hoc diductum sit atque detersum, ut unum eum vaginae continuum tubum efficiat, imò vero duarum unciarum & manus latitudinem habuisse viderit HALLER (z); vanus idcirco hic metus dicendus, & si forsan aliquando praecclusio orificii observata fuerit, haec potius perversae agendi rationi, rudiori nempe funis attractioni, & citae nimis placentae evulsioni tribuenda videtur, cum sic Naturae conamina turbentur, uterus irritetur, atque in contractiones spasmodicas cieatur (a); neque ob praesentem hanc coarctationem acceleranda est placentae extractio, uterus quippe post aliquod intervallum denuo contrahitur, atque hac ratione vel sponte, vel exhibi-

tis

(x) L. c. §. 202. p. 132. (y) Vid. SMELLIE Collect. 23. Case 1. & 2. T. 2. p. 390.
& LE ROUX l. c. §. 183. p. 120. (z) Vid. Elem. Physiol. T. 8. Part. 1. p. 451.
(a) L. c. p. 58.

tis idoneis remediis, ab hoc corpore sese liberat. Quae cum ita sint, neminem jam dari putem, qui non ultro fateatur, permagnis beneficiis ex hac doctrina cumulatam fuisse a Recentioribus Artem Obstetriciam, praesertim autem, cum ex toto sunt proscripta, Veteribus adeo familiaria, stimulantia & pellentia, quae necessario dolores, spasmos, febres, & quaevis pessima symptomata producere deberent.

Sequitur tandem ultimum in partu naturali adminiculum

VI. FUNIS DISCISSIO ET LIGATURA. Momentosa sane haecce cura a Veteribus habita fuit, adeo ut ARISTOTELES moneat: *In secando deligandoque infantis umbilico prudentia requiritur & peritia (b)*; imo vero totum Obstetricum officium antiquitus inde nomen accepit, ut *ἰμφολότομοι* ab HIPPOCRATE dicerentur (c), ipsa autem ars *ἰμφολοτομία* audiret (d), unde concludere licet, quanti eam olim fecerint.

Ad ipsam funiculi ligaturam quod attinet, illud animadverti meretur, quod raro duplici vinculo usi fuerint Veteres, cum plerumque una cum foetu placentam extrahere conarentur; quodsi tamen secundinae in utero relictæ fuissent, funem aequè a matris quam foetus parte ligandum esse, priusquam diffecaretur, sedulo monuerunt, atque hac cautela omiſsa, parturienti non minus quam infanti funesta haemorrhagia necessario pereundum esse, statuerunt; hinc ARISTOTELES: *Si secundinae non statim cum foetu exierint, dum intus ipsae, foris autem infans est, deligato umbilico secantur (e)*, apertius autem MOSCHIO hanc rem declarat: *Ex utraque parte ligandus est (funis), & sic in medio procidendus, ne & ipsa, quae parit, fluxum sanguinis patiatur (f)*.

At-

(b) Vid. *Hist. Animal.* L. 7. C. 10. (c) *De Morb. Mulier.* L. 1. p. 608. (d) Vid. ARISTOTEL. l. c. (e) L. c. (f) L. c. Part. 1. C. 10. Art. 7. p. 9.

Atque haec Veterum de necessaria funiculi ab utraque parte deligatione sententia, ad recentiora etiam tempora usque omnium Obstetricantium animis firmiter inhaesit, donec meliora docuerint Hodierni, statuentes, inutilem prorsus, quin noxiam esse, quae a parte placentae instituitur, ligaturam, eam vero, quae versus foetum fit, non adeo necessariam, vario etiam modo limitandam esse. Docuerunt scilicet inprimis nostri aevi Anatomici, non talem esse inter placentam atque uterum nexum, ut mutua detur vasorum inosculatio, adeoque per umbilicum, sanguinem, quī matris corpore continetur, effundi haud posse (g): quapropter etiam Obstetricantes, hancce inventionem in suos usus convertentes, funis ligaturam a parte matris omiserunt, atque observarunt, haemorrhagiam, quae tunc contingit, citissime fitti, quum ex solis placentae vasis sanguis exeat; imo vero hujus methodi magna notarunt emolumenta in facilitanda secundinarum extractione, quae volumine ita imminutae, longe melius vel ab ipsius uteri contractionibus, vel ab Obstetricante educi valent, unde a plerisque merito recepta fuit haecce encheiresis, uti a SMELLIO (h); FRIEDIO (i), STEINIO (k), WHITE (l), PLENCK (m) & BAUDELOCQUE (n); eandemque semper felicissimo cum successu in Gynaecio Argentinenſi institutam vidimus. Unicus tamen casus excipiendus videretur, in partu scil. gemellorum, ubi, altero in lucem edito, alter adhuc in utero continetur; in hisce enim, si placentae coalitae fuerint, metus esset, ne, funiculo non revincto, haemorrhagia relicto foetui letalis nasceretur, uti recte animadvertit BAUDELOCQUE (o):

atque

(g) Conf. inprimis A. MONRO in *Medic. Essays* T. 2. p. 133. ROEDERER in *Opuscul.* p. 73. §. 10. & p. 444. §. 6. tum & in *Tabul. Uteri Human.* p. 25. & seqq. in notis. G. AZZOGUIDI de utero p. 44—83. & Clar. FORSTEN in *Quaest. Select. Physiol.* praeside Celeb. VAN DOEVEREN defensis, L. B. 1774. p. 54. & seqq. (h) In *treatise &c.* Book 3. Chap. 2. Sect. 5. T. 1. p. 234. (i) L. c. Cap. 5. §. 193. (k) L. c. T. 1. §. 613. (l) L. c. p. 109. (m) L. c. p. 67. (n) T. 1. §. 807. (o) T. 1. §. 953.

atque haec cautela eo magis necessaria evadet, si utriusque funes in unum confluent, ubi ad placentam pervenerint, qualem observationem habet MERY (p). Ab altera tamen parte fatendum, in gemellis placentas longe frequentius contiguas esse quam continuas, ita ut nullum adfit inter utriusque vasa commercium, quapropter etiam in hisce tuto vinculum omitti potest.

Neque funis deligationem a parte foetus absolute requiri, demonstrarunt etiam Recentiores, observatione edocti, quodsi infans sibi relinquatur, sensim fisti arteriarum umbilicalium pulsus, & hoc sublato, absque metu funiculum dividi posse, neque sanguinem de eodem resecto effluere; idemque ex funis fabrica (q), mutata sanguinis circulatione, compressis per respirationem vasibus umbilicalibus, analogia brutorum, & experimentis in ipsis hominibus factis, ulterius comprobarunt: inter quos imprimis nominari merentur SCHULZE (r), ROEDERER (s), DE WIND (t), FRIED (u), STEIN (v), & BAUDELOCQUE (w). Etsi itaque non omnino necesse sit funiculum ligare, non ideo tamen hanc cautelam negligendam esse censemus, quum a stragulorum lectique calore, aliisque de causis incitata circulatione, sanguinis profluvium facile erumpere possit, foetuique funestum evadere; quales infastae Observationes memorantur a BOEHMERO (x), HALLERO (y), WHITE (z), & BAUDELOCQUE (a): quae mala ut praecaveantur, tutius vide-

(p) In *Memoir. de l'Academ. des Sciences*, l'an 1720. p. 13. (q) Constringuntur scilicet vasa umbilicalia non tantum per se, sed per tubum illum aponeuroticum, qui ex musculis abdominalibus ortus funem amplectitur, quemque optime descripsit F. H. BUCCHOLTZ in *Diff. de Hepatomphalocele congenita*, Argent. 1768. §. 2. (r) In *Collect. Diff. Anatom.* HALLERI V. 5. p. 607. (s) In *Opusc.* p. 439. (t) *Over het afbinden van de navelstreng*, p. 41, 42 & 64. (u) *L. c.* §. 193. & in *Diff. C. L. SCHWEICKHARDT de non necessaria f. u. deligatione*, Argent. 1769. §. 8. (v) *L. c.* T. I. §. 622. (w) *L. c.* T. I. §. 801. (x) In HALLER. *Diff. Anatom.* V. 5. p. 663. §. 37. (y) In *Elem. Phys.* T. 8. Part. 1. p. 443. (z) *L. c.* p. 108. (a) *L. c.* T. I. §. 203.

detur in omni casu funem vinculo constringere, ita tamen, ut in iis, qui plethorici nascuntur, haecce cura non prius instituatur, quam aliqua sanguinis copia ex umbilico effluxerit, uti summo jure monuerunt DE LEURVE (b), BAUDELOCQUE (c), alique.

Ad tempus vero, quo a placenta liberari debeat foetus, suadet HIPPOCRATES: *Si foetus non facile exeat, sed cum labore neque sine medici ope, hujusmodi foetus cum pauci sunt temporis, his non ante abscindendus umbilicus, quam vivam reddiderint, sternutarint, aut vocem ediderint, sed sinendi sunt (d)*: atque hoc HIPPOCRATIS praeceptum plurimi etiam inter Recentiores secuti sunt, sperantes, hac ratione languentem in foetu circulationem ab affluente matris sanguine, aut calore uteri, incitari, vel & plane cessantem renovari posse; quin imò alii placenta ex matrice jam exemitam, & cum foetu perpetuam, in pelvim aqua aut vino calido repletam eodem scopo immergendam suadent: verum haec methodus, quam CRANTZ (e), G. WATTS (f) & ipse SMELLIE (g) commendant, inanis dici meretur; explosa enim vasorum uteri & placentaе mutua anastomosi, nulla datur ratio, quare circulatio a relictis in matrice secundinis redintegrari possit, quin & instituto experimento observavit ROEDERER (h), arteriarum umbilicalium pulsus citius desinere, quam si aëri nudo expositae fuissent; exemta autem placenta, & in calidam demersa, etsi diutius pulsatio duret, quam in solo aëre, ut idem quoque notavit, multum tamen abest, ut imminuta augeri, vel penitus sublata restitui possit. Nec inutilis tantum, verum summopere noxia haec encheiresis reputari debet infantibus, in qui-

(b) L. c. §. 844. (c) L. c. T. 1. §. 892. (d) Vid. *Libr. de Superfoet.* p. 261. & seq. (e) Vid. *Hebammenkunst*, p. 48. (f) In *Comm. Lips.* V. 5. p. 441. (g) *At trentise &c. Book 3. Chapt. 2. Sect. 4. T. 1. p. 228. & 29.* (h) *Icon. Uteri Human.* p. 27 & 28. in notis.

quibus dubia sunt vitae indicia ex eo, quod a coacervato circa cor & pulmones sanguine respiratio impediatur; in his enim ipsa funis discissio quam citissime peracta, & sanguinis ex eoeductio, optimum, uti modo vidimus, ad suscitandam vitam sese praeber adminiculum, quapropter merito SMELLIUM reprehendit BURTON (i), quod inepta haecce adeo laudaverit; eademque etiam summopere rejicit BAUDELOCQUE (i*).

Nec minus reprobanda est sanguinis ex funiculo repressio versus foetum, quae olim maximo in usu erat, ubi infirmus in lucem ederetur infans, quodque artificium plurimum laudavit ARISTOTELES: *Saepe visus est puer emortuus nasci, cum ei infirmo prius quam deligaretur umbilicus, sanguis in umbilicum & circa, efflueret. Sed jam aliquae obstetrices factae peritiores reprimunt intro de umbilico sanguinem, quo facto, statim infans, qui modo exsanguis deficiebat, recreatur, vitaeque restituitur* (k); hoc autem consilium, quod non Antiqui tantum sed & Neotericorum nonnulli dederunt, jam suo tempore rectissime damnavit MAURICEAU (l), cum sanguis hicce grumosus & coagulatus non nisi maximas noxas foetui inferre potest, uti etiam notat LEVRET (m).

Quanto melius igitur & hoc in opere procedunt Hodierni, qui, vanis hisce & noxiis rejectis, non generalem quandam, in omnibus adhibendam, curandi methodum praecipiunt, sed ad varias causas respicientes, diversa proponunt adminicula, singulis accommodata, quibus debilis foetus tutissime ad vitam revocari possit (m*).

Nec operae pretium erit, hic multis memorare aliam quandam cautelam, quam nonnulli voluerunt, ut, priusquam ligaretur funiculus, omnis sanguis, qui in-

ter

(i) In letter &c. p. 22, 23, III. & 112. (i*) L. c. T. I. §. 815. (k) Hist. Anim. L. 7. C. 10. (l) L. c. T. I. p. 358. (m) In Comm. Lips. V. 20. p. 646. (m*) Conf. praeter alios BAUDELOCQUE l. c. T. I. §. 809—815.

ter abdomen foetus & locum constringendum continetur, studiose emulgeretur, quo sperabant fore, ut morbus variolosus, cujus somitem in illo sanguine haerere opinabantur, feliciter averruncari posset. Mirum sane, absurdam hanc opinionem, cujus vestigia jam apud Arabes reperiuntur, nostris etiam diebus, in tanta Physiologiae luce a quibusdam denuo commendatam fuisse, ita ut Medicinae quidam Professor U. C. SALCHOW anno 1776 hanc methodum tanquam optimum variolarum prophylacticum promulgaverit (n), quin & in alia Germaniae parte obstetrices mandato publico ad hancce encheiresin obstrictae fuerint: verum non ipsa tantum ratio, sed & BURGGRAVII (o) experimenta, quibus observavit, infantes nihilominus variolis non modo correptos, sed & enectos fuisse, jam dudum evicerunt, hancce cautelam, Medicorum attentione prorsus indignam, ad muliercularum figmenta & aniles fabulas esse relegandam.

Atque ita primaria, quae Argumenti ratio postulabat, absolvimus momenta, & ex singulis evidentissime, ni fallimur, insignia Recentiorum in Artem nostram merita ostendimus; quum enim partes illas, in quibus foetus durante graviditate hospitatur, & per quas in lucem emitte debet, quae Artis basin ac fundamentum constituunt, multo melius hodie cognitae habeamus; quum conceptionis indicia firmiora ac certiora perspecta sint; quum partus mechanismus tam egregie Recentioribus innotuerit, ut vel levisimae deviationes a progressu naturali intelligi, & aptis auxiliis corrigi valeant; quum denique omnia illa adminicula, in partu naturali a Neotericis adhiberi solita, tam eximie matris viribus ac vitae consulant, & omnia, quae foetui imminent pericula, optime avertant, quid demum impedit, quo minus concludamus, insignem esse Artis Obstetriciae hodiernae prae veteri praestantiam.

(n) Vid. *Berlinische Sammlungen*. IX. Band. III. Stück p. 230.
Medic. T. 4. Appendic. p. 40.

(o) In *Novis Act. Phys.*

T H E S E S.

- I. *Venas Meſeraïcas partem chyli abſorbere, contra HUNTERUM ſtatuo.*
- II. *Primaria fluxus menſtrui cauſſa in periodico ac determinato quodam vaſorum uteri motu quaerenda videtur.*
- III. *Quintum nervorum par merito acceſſorium ſenſuum externorum appellaveris.*
- IV. *Ratio, cur in adultis foramen cordis ovale aliquando apertum inveniatur, ex fabrica valvulae EUSTACHII repeti debet.*
- V. *Etſi non omni dubio major ſit JONSTONI circa uſum gangliorum ſententia, id tamen aſſeri poteſt, quod ganglia dentur praecipue in nervis, qui tendunt ad partes voluntati haud ſubjectas.*
- VI. *Non alia dantur Argillae principia, quam terra aluminis & arena, quum vero facile ſeſe aqua dilui patiatur, & diluta omne genus corporum recipiat, hinc creberrime variis, & diverſiſſimis ſubſtantiis inquinata ſolet occurrere, & haec ratio eſt, cur tantopere de Argillae natura Chemici inter ſe diſſentiant.*
- VII. *Atque haec Aluminis terra ſui generis eſt, ad Calcareas aut Vitreſcentes non referenda.*
- VIII. *Immerito Lapidem Lazuli ob Cupri ſuſpicionem ad venena relatum fuiſſe, pulcra MARGGRAFII experimenta evicerunt.*
- IX. *Etſi experientia adhuc deficiat, Mercurius Vitae reliquis ex Stibio praeparatis ad conſciendum Tartarum Emeticum aptior videtur, quin ipſi Vitro Antimonii praeferendus.*
- X. *Saepius praestat pius inter laminas Corneae haerens relinquere, quam extrahere.*
- XI. *Facta amputatione, arteriae non cum partibus vicinis, ſed ſolae filo conſtringi debent.*
- XII. *In operatione aneurysmatis longe tutius eſt partem arteriae relinquere, quam totum tumorem auferre.*
- XIII. *Calculi veſicae figura ac ſitus melius digitis, quam instrumentis dignoſci poſſunt.*
- XIV. *Erronea eſt LEVRETI ac ROEDERERI ſententia, qua pelvis axin per lineam rectam determinandam voluerunt.*

XV. *Datur quaedam obliquitas uteri naturalis.*

XVI. *In haemorrhagiis gravidarum ac parturientium, turundae liquore quodam styptico imbutae & in vaginam immiffae, quae a LE ROUX imprimis commendantur, praestantiffimum sese sistunt adminiculum, quin pluribus in casibus PUZOSII methodo praeferri debent.*

XVII. *Praeter Forcipes Smellianas & Levretianas quam maxime etiam laudari meretur Johnsoniana, utut a STEINIO vituperetur.*

XVIII. *Clunibus praevis atque in apertura pelvis inferiore incuneatis, Forcipsis usus reliquis, quae vulgo laudantur, auxiliis longe securior est.*

XIX. *Licet in transversis capitis incuneationibus fabricae partium magis accommodata sit Forcipsis methodo Smelliana applicatio; testantur tamen eximiorum Virorum observationes, feliciffime etiam protrahos fuisse infantes, si facies atque occiput ejus brachiis prehenderentur.*

XX. *Quum varia dentur obfetrantium observata, quae felices Forcipsis successus etiam tunc, ubi caput nondum pelvis cavum intraverit, confirmant, non video, cur haec machina eo in casu a nonnullis tantopere improbetur.*

XXI. *Vix aliqua est Sectionis offium pubis utilitas.*

XXII. *Etsi acrimonia Scorbutica non recte cognita sit, multa tamen cum morbis putridis habet communia.*

XXIII. *Icterus neonatorum praecipue a mutata circulatione & turbis inde in hepate oriundis, derivari debet.*

XXIV. *Caute cum aperte acidis & promte acescentibus in febribus biliosis mercandum.*

XXV. *Sedes pleuritidis exquisitae est in thoracis partibus continentibus, nec obstat, quo minus etiam haec per sputa judicari possit.*

XXVI. *Sensus caloris a vero caloris gradu distingui debet.*

